

文獻叢編

第八輯

文獻叢編第八輯目錄

官文像

曾國藩像

雍正硃批諭旨不錄奏摺

河南巡撫田文鏡奏報年羹堯車輛送交處所摺

江蘇巡撫張楷奏追拿年羹堯情形摺

兩廣總督孔毓珣奏查年羹堯財產摺

浙江巡撫傅敏奏年羹堯散給親近人員財物摺

江西巡撫裴鋐度奏年羹堯私販川木摺

四川巡撫王景灝奏年羹堯捐馬情弊摺

江蘇巡撫張楷奏年羹堯運售川木並未納稅摺

四川巡撫王景灝奏實未總理布隆吉修城事件摺

西安按察司許容奏年羹堯行鹽銀兩分年帶銷情弊摺

兵部左侍郎副總河稽曾筠奏劉子正到工効力日期摺

四川巡撫憲德奏查封岳鍾琪財產旨請迅賜來川摺

四川巡撫憲德奏報岳鍾琪田房數目摺

蘭州巡撫許容奏密查岳鍾琪財產摺

四川總督黃廷桂巡撫憲德奏查明岳鍾琪房產人口摺

光緒辛丑電報  
年羹堯奏摺續

醇親王奕譞致軍機處尺牘

違礙書籍單 乾隆四十四年九月閩浙總督兼署福建巡撫三寶查繳


(所三宮故藏件原) 像文官



太子太保原任文華殿大學士一等果威伯諱文恭官文

原件 長 47 寬 34 C.M.

(所三宮故藏件原) 像 藩 國 曾



贈太傅原任武英殿大學士兩江總督一等毅勇侯諱文正曾國藩

原 件 長 4 7 寬 3 4 C.M.

雍正硃批諭旨不錄奏摺

雍正十年曾將歷年硃批奏摺分別選刊名曰「硃批諭旨」凡二百二十三人此項奏摺散存故宮各檔箱中凡已刊者於包面上書已錄二字未刊者書不錄二字已由本院文獻館編有「雍正硃批諭旨不錄奏摺總目」其中重要史料頗多茲略爲選擇照錄發表

河南巡撫田文鏡奏報年羹堯車輛送交處所摺

河南巡撫臣田文鏡謹奏爲遵旨據實密奏仰祈聖鑒事竊臣於雍正三年四月二十九日欽奉皇上硃批諭旨聞得年羹堯正二月間有二十車東西自潼關來河南不知送交與何處可密密確訪奏聞等因欽此臣遵即密差奉發侍衛來豫候補之白琦扮作車主沿途確訪業經臣於本年五月二十六日將訪查情形并經過豫省日期繕摺奏聞在案今又據白琦回稱訪至保定府有年羹堯所買原任總漕臣王樸住宅一所於本年二月十八日將車一十九輛卸入此宅係年羹堯家人嚴二收管並無寄放別處所有年羹堯經過豫省車輛

數目以及送交處所日期理合繕摺密奏仰祈聖鑒又臣查年羹堯於本年三  
月內有車十七輛又有車十四輛由豫省經過俱往北去又於本年五月內陸  
續共往南去家口一百五十五人牲口一百四十二個車陸十輛轎二十二乘  
駄子七十九個俱由河南府屬之孟津縣經過盡出豫境並無寄放別處物件  
合併奏聞爲此謹奏雍正三年七月初陸日

硃批朕已嚴諭直省如今不能隱慝矣

江蘇巡撫張楷奏追拿年羹堯情形摺

江蘇巡撫臣張楷謹奏爲奏聞事竊臣於六月二十九日酉時接准部文奉旨  
提拿宋師曾供出年羹堯家人魏堂官洪堂官等因臣隨飛飭地方官查拿併  
委蘇州府知府蔡永清同臣標中軍游擊黃賢前往挨查提拿去後於七月初  
一日據該府等覆稱年羹堯座船先於六月二十九日辰刻過蘇卑職星夜追  
趕於初一日早追至嘉興府查得年羹堯船於二十九日亥時過嘉興連夜往  
浙赴任不便越境查拿等情臣即行咨浙江撫臣查拿並據情咨部外初二日

接到無錫縣報文其洪堂官已於初一日該縣會同總督查弼納差來之江寧府理事同知在無錫縣地方拿獲等情臣又查得年羹堯由江寧一路到蘇門旗燈籠概不張掛即船窓亦皆掩閉隨身跟有大小船隻三十餘號其餘家口由儀徵陸續前往大有消沮閉藏之狀又訪得沿途官員俱無迎送之事合行奏明又總督查弼納自蒙皇上教訓申飭之後甚是恐懼小心昨六月十四日伊妻病故竟不受弔屏絕應酬勤謹辦事又布政司鄂爾泰仰遵訓旨諸事盡心帮臣料理並不懈怠今因會同按察司承審常熟縣虧案現在江寧未回又臣前奉諭旨命訪淮安關慶元新設口岸之事已經具摺回奏今又訪得慶元於去冬新設流均溝永豐莊新湖安東四處今春止撤去安東口岸其流均溝等三處口岸猶存查流均溝在府城東八十里一帶河道通鹽城高郵寶應興化泰州等處柴草雜糧魚米等物向係直抵東關歷無稅鈔今慶元築壩設關收稅往來行舟不便又淮城居民附郭田畝所收米麥秫荳發往本家原無納鈔之例慶元盡令上鈔商民不無嗟怨合將續訪情由臣謹一并繕摺奏聞伏

乞皇上睿鑒施行右謹奏聞雍正三年七月初八日

硃批知道了著實嚴察再加密訪一點疎息不得

兩廣總督孔毓珣奏查年羹堯財產摺

兩廣總督臣孔毓珣謹奏爲奏明事本年七月二十五日接到部文奉上諭年羹堯將所有資財產業分散各處藏匿寄放著直省督撫提鎮通行嚴查欽此遵即分行臣屬東西兩省文武嚴查曉諭外查年羹堯有女許配臣族兄已故衍聖公孔毓圻之第四子爲妻康熙六十年值年羹堯陞任川陝總督將赴西安時臣任四川布政使年羹堯將拆存舊屋楠木樑柱等料長短不等交臣覓便帶赴山東寄貯俟伊女遺嫁時取作家伙皿臣隨差衛役二人送往山東濟寧州城內空房收貯至今年羹堯之女尙未遺嫁木料亦未取去其木頭約計八九十件細數臣不能記憶又臣于康熙六十一年陞授廣西巡撫路由西安年羹堯言及伊女將來遺嫁欲在山東置買庄子大者一處小者兩處價值萬金以作奩田託臣向親友及家人尋問有即通知等語適臣有家人回籍臣

即以年羹堯之言諭之後臣在廣西任內據臣家人稟稱據田牙人等尋有濟寧州汶上縣交界地方土名凡章江姓莊田出賣寫信往西安年羹堯隨差伊家人徐姓張姓數人前來看田交成價值一萬一千兩有零契內寫在年羹堯女婿名下等語聞得買後係年羹堯之婿差人經管今奉旨清查年羹堯財產臣既知其事不敢不據實奏明臣謹雍正三年七月二十六日  
硃批知道了此事已有人奏過

浙江巡撫傅敏奏年羹堯散給親近人員財物摺

署理浙江巡撫印務吏部右侍郎臣傅敏謹奏爲奏聞事臣自到浙之後年羹堯並不到臣署相見亦不曾恭請聖安臣近日復加密訪皆云伊前所帶人甚多漸漸散去今尙存三百餘口至其如何散去之處蹤跡詭密不可得知又革去將軍任時以所帶驃馬遍賞伊親近人員又將緞疋銀兩分給衆人以故愚昧之人頗多感激年羹堯者臣因細訪曾受伊私惠之人其明白較著者有職官一員鑲黃旗固山大蘭焰鑲黃旗參領包安又郭齊哈撥什庫六人德倫泰

雅圖福則寶那三泰劉整康士麟又筆帖式四人三雅圖胡申泰丑哥明柱此  
外受其惠者尙多但伊等深自諱匿一時不能周知俟再有所聞另摺具奏臣  
謹奏雍正三年九月二十日

硃批朕意已決矣

江西巡撫裴澤度奏年羹堯私販川木摺

江西巡撫臣裴澤度謹奏竊臣接准部文行查年羹堯寄放貨財就經通行飭  
查去後又准督臣查弼納咨有年羹堯私販川木及廣東紫檀木現在江南臣  
思運未必經各關何以並未據報正在行查隨據南康知府張景良首報雍正  
二年六月間有川木簰一宗到關該料三百陸十餘兩持有布政使石成峨書  
函係受江安糧道馬世珩轉托內開年公爺木植到關即放料銀代完因遼放  
關未及回明石司旋故未完料銀情願照數賠補又據贛南道王世繩首報本  
年二月內有廣東紫檀木一宗該稅銀伍十餘兩原任總兵黃起憲知府孔傳  
熹懇求放關所有稅銀已照數代完及過大姑塘時查係搭入糧船裝運無憑

稽察臣思經過木植雖與寄放貲財不同但私自聽情即代完稅銀亦屬不合至贛州知府孔傳熹差人護送更干罪愆應聽督臣究審合將九江贛州二關首報完補情由據實奏明再查年羹堯續運木植現在查阻並無偷越並貲財有無寄放之處應俟各屬確查覆到之日另行奏聞臣不勝悚惶屏息之至雍

正三年十一月初八日

硃批知道了似此遺愧之事將來當深以爲戒

四川巡撫王景灝奏年羹堯捐馬情弊摺

四川巡撫臣王景灝謹奏爲奏聞事臣查年羹堯在四川任內冒銷軍需銀一百六十萬兩有零借軍需名色私派銀五十六萬兩有零已經另疏具題臣又查年羹堯曾經題請於打箭爐口外裏塘巴塘二處照康熙三十六年捐馬事例加倍開捐自打箭爐倉領運官米至裏塘者以米六石作馬一匹但臣訪得年羹堯實於省城折收銀兩捐官之馬每匹收銀六十兩捐貢捐級之馬每匹收銀五十兩捐監之馬每匹收銀三十二兩五錢而自打箭爐運米至裏塘每

石寶止用腳價銀一兩六錢五分自打箭爐運米至巴塘每石寶止用腳價銀三兩一錢五分查年羹堯自康熙五十八年開捐起至康熙六十年春季各官生捐運裏塘米五千九百四石作馬九百八十四匹內捐官馬六百八十八匹捐貢捐級馬四十四匹捐監馬二百五十二匹捐運巴塘米二萬三百八十八石作馬六千七百九十六匹內捐官馬五千八百五十四匹捐貢捐級馬二百七十四匹捐監馬六百七十二匹案冊雖稱領運而折收銀兩是實計算年羹堯借捐納之名共得銀三十六萬四千二百八十六兩二錢應請於年羹堯名下著追臣緣查出折收銀兩情弊不敢隱諱謹繕摺奏聞雍正三年十一月初八日具

硃批該部察議具奏

江蘇巡撫張楷奏年羹堯運售川木並未納稅摺

江蘇巡撫臣張楷謹奏爲奏聞事臣准部咨欽奉上諭嚴查年羹堯資財產業藏匿寄放江南令速行自首欽此欽遵臣即通行各屬嚴查去後於本年七月

十三日據江安糧道馬世珩詳稱雍正二年九月間有陝西莊浪縣典史朱尙文押運川木兩簰係年羹堯採買杉柏等木運至江寧覓售嗣有木商余國甸發賣除費用外現存市平銀八千二百兩世珩因係年羹堯舊屬難以峻拒今奉上諭通查先遵首報再本年三月內世珩督運在淮又運到紫檀木大小十九根現在高郵州存貯朱尙文已回陝訖等因同日又據江寧府知府郭汝樞詳稱查訊看廠人余國甸原報明木頭共是一萬零三百多根卑府照則核算應上稅銀一千五百餘兩細查上年龍江關冊卷並未納稅等因同日又據原管龍江關稅務江南驛鹽道徐克祺詳稱上年九月內有陝督年羹堯川木二簰到關商人朱尙文報明應上稅銀一千五百餘兩克祺必要現銀上稅方准過關阻留在關幾及一月隨後有前署江寧撫院何天培發字一函諭令即放過關等語克祺奉署撫院札諭其稅銀至今未上此係實情不敢隱蔽各等因前來臣即批行按察司會同布政司嚴查年羹堯存貯木植及並未納稅緣由另行具奏併又通行各屬有無藏匿寄放之處立速嚴查通報外合先據詳

繕摺奏聞伏乞皇上睿鑒施行右謹奏聞雍正三年七月十六日

硃批知道了查必納亦奏過

四川巡撫王景灝奏實未總理布隆吉修城事件摺

四川巡撫臣王景灝謹奏爲遵旨明白回奏事雍正三年九月初三日准兵部封發內閣交出欽奉上諭事甘肅巡撫石文倬摺奏布隆吉城垣營房俱不堅固多有傾圮年羹堯漫不審擇地利委令前任西安按察使今四川巡撫王景灝布置安排總理其事繼又轉交白訥草率完工冒銷錢糧不顧新設防兵居住等因奉旨這事情著王景灝明白回奏欽此並發城垣營房情形一摺到臣竊臣於雍正元年七月初六日在西安按察司任內原任總督年羹堯委臣同原任臨洮府知府白訥料理布隆吉城工事務臣於起身時年羹堯云我於康熙六十一年十月內從巴里坤回肅之時特到布隆吉看明駐防參將孫繼宗營盤之前地勢寬敞即在彼處建城甚好臣於八月二十六日始抵布隆吉地方照依年羹堯所言之地與白訥公同簽定城基正在燒造磚瓦砍伐木植竭

鑒經營之際忽於雍正元年九月二十九日接得年羹堯調赴西寧辦理軍務之文令臣星夜趨赴軍前將城工諸事交與臨洮府知府白訥料理臣轉交明白即於十月初一日自工所起程趕赴西寧後因阿爾薩朗蠹動騷擾白訥報稱不能興工迨至雍正二年三月內白訥始報動工修築彼時正值春融凍解如地形崎窪潮濕白訥即應將不便建城之故詳明年羹堯另擇地基何以默無一言竟爾草率從事今經甘肅撫臣石文焯摺奏城牆塌陷裂縫營房間架窄小兼有傾倒之處則白訥係親生督理之員難辭潦草完工之咎其城基係年羹堯指定地方工程係白訥專管修築臣在西寧辦理軍務實已不任城工之事在甘撫臣石文焯未知顛末以臣爲總理其事之人荷蒙聖明洞鑒不加嚴譴著臣明白回奏臣不勝感激涕零謹歷叙緣由繕摺據實奏明伏乞皇上睿鑒再查年羹堯發銀十九萬兩除發甘州衛所採買米石並接運平涼米石共米二萬石存貯肅倉用過銀五萬六千六百六十兩不入城工之項外臣發涼甘肅等廳衛僱夫匠買運布隆吉夫役口糧及各項物料動用過銀五萬

九千七百一十三兩八錢七分俱有各廳衛所文冊現據又轉交白訥銀五萬  
五千兩在布隆吉使用又存留肅州公庫銀一萬八千六百二十六兩一錢三  
分亦令白訥支用城工項下臣共發過銀一十三萬三千三百四十兩業經分  
晰開冊咨移川陝總督臣兵鍾琪查核在案合併奏明雍正三年九月初六日  
具

硃批交與議政矣

西安按察司許容奏年羹堯行鹽銀兩分年帶銷情弊摺

陝西西安按察司仍兼管督糧道事臣許容謹奏爲據聞入告仰祈鑒察事竊  
查年羹堯行鹽本利銀兩經部臣史貽直等審明交巡鹽御史變追入官鹽臣  
馬喀據商人范毓讚等呈詞將潞澤等十七處應變鹽價除現存銀兩並房屋  
等項共銀二萬四千七百餘兩令地方官自行變賣交納外其存積鹽斤應變  
銀一十五萬七千餘兩請分十年帶銷又據商人王烈等呈詞將咸寧等七處  
應變鹽價銀四萬六百餘兩請分五年帶銷臣甫讀奏疏通官引裕商力所請

誠是矣嗣臣訪查西陝省城之咸寧縣應變鹽斤歲前十二月內已報完銀一萬三千八百餘兩止存未變鹽三十五萬九千八百八斤長安縣應變鹽斤銀二千七百餘兩歲前已盡數報完兩縣俱有原報案卷可查亦有經管經承可訊此外各處臣隨查訪未確聞已變賣將完馬喀身爲鹽臣各處報完數目自必早已深知乃將二十萬現有之帑金分爲十年五年帶銷之賒欠臣實不知其是何肺腑也查西安府經歷今陞廣西雒容縣知縣馬樸本籍運城向曾充商臣聞其洞悉此中情由今於四月初八日領咨赴部引見伏乞皇上勅下查問則鹽斤會否變賣鹽臣因何具題自難逃於聖鑒矣臣兼管糧鹽有所見聞不敢謚顧隱瞞爲此繕摺密奏伏惟睿照臣不勝惶悚戰慄之至謹奏雍正四年四月十二日

兵部左侍郎副總河稽曾筠奏劉子正到工効力日期摺

兵部左侍郎副總河臣稽曾筠謹奏爲欽奉上諭事雍正四年七月十四日准吏部咨文內開六月二十三日奉旨劉子正詔媚年羹堯餽送禮物古玩等項

旣自行首出從寬免交刑部治罪著革職發往稽曾筠田文鏡處在河工自備  
資用効力行走若遲延推諉不肯出力該督撫題參從重治罪欽此七月二十  
八日准撫臣田文鏡咨稱劉子正已經到省應聽飭發効力等因臣隨查蘭陽  
縣南岸有新生險工最爲緊要即飭令安挿蘭陽縣南岸地方効力行走據該  
縣報稱該員於八月十七日到工臣謹宣傳聖旨嚴飭該員自備資用於一切  
修防事宜務期殫心竭力加謹搶護若遲延推諉不肯出力即行會疏題參外  
所有劉子正到工効力日期理合繕摺奏聞伏祈睿鑒謹奏雍正四年八月二  
十七日

殊批知道了此等人不可仍令其溫飽安閑也

四川巡撫憲德奏查封岳鍾琪財產旨請迅賜來川摺

四川巡撫臣憲德密奏爲欽奉上諭事雍正十年八月十四日准大學士鄂爾  
泰張廷玉字寄內開雍正十年七月二十三日奉上諭岳鍾琪自領兵以萊並  
無調度屢失機宜此其罪之大者至於喪失駝馬糜費錢糧之處又不可悉數

今已降旨將伊調取來京詢問伊所有產業資財應令史貽直憲德各於所轄地方暗暗查記以備將來賠補公項之用此時不可聲張亦勿令他人知之爾等可密寄信去欽此遵旨寄信前來等因到臣臣隨將岳鍾琪在川所有一切房屋田土現在暗暗查記不至遺漏惟是資財等物藏之室內者不能確悉臣目今不敢聲張查封伏祈皇上容臣查封之旨迅賜來川庶不致有隱匿轉寄之處臣之愚見若此是否可行伏候睿鑒臣准大學士等字寄到日正在文閣未便具摺奏請茲於出闈之日專此密奏合併陳明謹奏雍正十年九月初一日

硃批覽

四川巡撫憲德奏報岳鍾琪田房數目摺

四川巡撫臣憲德謹奏爲密奏事竊臣欽奉諭旨令將岳鍾琪產業資財於所轄地方暗暗查記臣欽遵共查記得各屬城市鄉村共有田地七千餘畝瓦草房屋五六百餘間其餘遠僻一二處尙未查確所有先經查出田房數目合先

奏聞爲此密奏雍正十年十月二十八日

硃批覽

蘭州巡撫許容奏密查岳鍾琪財產摺

蘭州巡撫臣許容謹奏爲訪查具奏事雍正十年九月十五日臣自肅起程回蘭於十六日途中接大學士張廷玉寄信雍正十年九月初二日奉上諭岳鍾琪自領兵以來並無調度屢失機宜此其罪之大者至於喪失駝馬糜費錢糧之處又不可悉數前降旨將伊調取來京詢問伊所有產業資財已令史貽直憲德於所轄地方暗暗查記以備將來賠補公項之用聞伊祖業在蘭州地方且有至親在彼將來或有寄頓藏匿之處亦未可知著許容密爲訪察此時不可聲張亦勿令他人知之爾可密寄信前去欽此遵旨寄信到臣臣遵即留心體訪回署後復諭按察使李世焯密爲查察今查出平番縣北門及北門外有岳鍾琪舊房三處共計正廂大小樓平土瓦房屋一百二十間內多塌損不全又北門外有水地數段約計一百七十餘畝有伊家人張茂看管又查出狄道

縣談家寨有伊祖墳二座墳旁瓦房六間係鄰人宋之美照看左近共有原押  
墾地二頃八十畝緣岳鍾琪久已入籍川省俱係狹邑屯民承種納賦並無族  
姓管業收租又蘭州永泰地方亦有岳姓祖墳並有岳姓居住均係務農爲生  
所種田地有限並無岳鍾琪產業此外有土司魯華齡係伊表親臣久聞其素  
不和睦別無產業資財亦未見有寄頓藏匿嗣於十一月初九日接奉部文又  
復通行所屬嚴行稽查俟查明確遵照部示另行咨部外所有暗暗查記緣  
由合先繕摺具奏伏惟聖鑒臣謹奏雍正十年十二月初六日

硃批知道了此皆不必查究者

四川

總督  
巡撫  
憲德

奏查明岳鍾琪房產人口摺

四川總督臣黃廷桂巡撫臣憲德謹奏爲奏聞事竊臣等接准部咨欽奉上諭  
令將岳鍾琪家產宦貲查明登記欽此欽遵隨即會行布按二司嚴飭各地方  
官將岳鍾琪凡有家產宦貲逐處查明登記毋得容其寄頓隱匿併出示通行  
曉諭令各首報去後今據布政使劉應鼎按察使高維新詳據成都華陽溫江

金堂彭縣彭山邛州各州縣查明在城在鄉一應田房產業人口及家俱器皿等項造冊前來查成都城內瓦房六百一十八間草房二十九間家人共男婦二十九名口城外瓦房二百七十八間草房八十八間管庄家人男婦共五十名口成都溫江二縣共上中下水田三十頃五十七畝零上中下地陸百八十畝零金堂彭縣彭山邛州四州縣共上中下旱田十頃十一畝零上中下山地五十一頃三十八畝零總計水旱田地九十八頃八十八畝零業經造具清冊咨部誠恐各屬尙有未盡仍嚴飭確查無致稍有隱漏外所有查明岳鍾祺房產人口什物等項造冊送部緣由理合繕摺奏聞謹奏雍正十一年六月二十日

硃批覽

光緒辛丑電報

軍機處檔存有電報多通中有關於光緒二十七年（西紀一九零一年）辛丑條約之件爲中國全權大臣奕劻李鴻章等由北京發往西安者按慈禧與光緒帝於光緒二十六年七月出奔西安二十七年八月回鑾故當日全權電報皆致西安軍機處茲按其發電先後依次發表并將發電時日各書於每電之前以醒眉目

一 光緒二十七年正月十一日 上午十一點十五分 北京發

火急西安軍機處上年十二月二十五日蒙恩將徐用儀等五員開復原官當即恭錄諭旨照會各使旋據該使等面稱該五員實係力駁攻擊使館致罹大辟代抱不平頃據領銜葛使照稱諭旨內有數句令人閱視一似攻擊使館該徐用儀許景澄袁昶聯元立山五員之意按諸國大臣所閱發抄該五員之奏摺明與此語不符是以諸國大臣未能允在公文中有此等隱括之詞現核定應另請重發開復該五員之諭旨其中務須詳細言明開復慘罹大辟之五員

係因其當日力駁攻擊使館之故等語查上諭內朝廷以剿撫兩難迭次召見臣工以期折衷一是乃徐用儀等經一再垂詢詞意均涉兩可與廷臣同召對時所聞之語似有未符使館內來往傳話者衆口一詞是以該使等不願在公文中有此等隱括之語雖係加恩臣下與外人無涉而其獲罪因力駁攻擊使館亦難禁其饒舌若置之不理恐不肯續議別欵致礙和局擬仍與該使等婉商未知其甘服否應如何預籌變通之處伏候聖裁請代奏奕効李鴻章真正月十二日丑刻到

一一光緒二十七年正月十五日上午十點三十五分北京發

火急西安軍機處宙元電悉先是德使派參贊來詢專使赴德擬派何人答以未定伊詢醇親王何如答尙謹慎何不往來晤談醇遂與穆使瓦帥相見該使電知國王均以爲然旋又照稱本國皇帝提明俟中國照各國公索各欵全行照允方願接待專使等語查醇王年歲雖輕志趣尙好上年拳匪內訌莫贊一詞尙守家教惟交涉向未閱歷伊已約定張翼偕往贊助記名副都統廢昌前

駐德年久熟悉情形擬請派該員等並充參贊庶無隕越第懲辦禍首雖定該使等多方磨難續議各欵屢催不就看來一時斷難合拍此事應俟公約畫押時再行降旨請先代奏奕効李鴻章咸正月十五日亥刻到

三光緒二十七年正月十六日上午八點四十分北京發

火急官報西安軍機處今日傍晚格使來言俄廷電問中國何日定議畫押答以楊使電應俟各國答覆再議各使亦向敝處聲明不可遽許格謂此事與各國無干若向俄廷言及必堅拒碰回試思東省先與俄戰俄費許多兵力血戰傷亡若干人而得之今一旦交還實由我皇寬仁外戶部力顧睦誼所訂條款再三刪減並無碍中國主權若謂恐他國效尤各國現議留兵保護使館及沿途暢道與俄約暫留兵一殷同且俄留兵尙有撤回之日連累各處蒙古新疆礦路不得讓他國若前數年英議定長江利益不許讓他國德議定山東利益不許讓他國日本議定福建利益不許讓他國中國皆已允行何獨斬於俄尙慮他國效尤耶我此來實爲交情若置不理我國必有訓條另用公文限期成

議勿嫌唐突因允將所言轉奏並電楊使旋又婉商有何通融之法彼謂若以第八欵各節第七欵金州自治廢除或改作專條密約問礦路宜聲明中國自辦不在此例格云伊不敢擅改由楊在俄商辦語畢悻悻而去除電楊使外請代奏奕効李鴻章諫印正月十七日酉刻到

四光緒二十七年正月十六日下午十二點五十分北京發

西安軍機處蒸元電旨敬悉楊使元電應俟各國答覆再議是尙未開議格使因聞各國饒舌中朝遊移負氣不肯相商頃璞科第來言格接本國密電云將定期全商妥畫押如踰期須增出條欵再踰期則決裂不與商辦羅使元電英外部但言商明德日美政府並未允向俄國排解似即排解俄必堅拒此事竟無結束國書固甚懇切而部臣未必受商量恐愈緩愈緊務望熟籌利害相機因應爲要除電楊使外請代奏奕効李鴻章諫印正月十七日子正一刻到

五光緒二十七年正月十七日下午九點五十五分北京發

中國火急官報西安軍機處刪電述劉張電語似影響之詞英薩使常晤並無

在京與俄訂約之說何得誑言德領謂中國儘可以各國勸阻之詞拒俄或由中國將俄約布告各國約齊向俄理論可和平了結彼蓋謂俄畏各國不知一提各國俄即艴然怒若將俄約布告怒必更甚向例兩國議約未定稿之先不得漏與他國况布告耶諫電垂詢磨難者何事即如第七欵使館所在境界自行防守初謂不過略擴基址前送說帖聲明須彼此勘定界址將內有公所衙署劃出乃該使等自行會議數次並未彼此會同勘議輒用照會繪圖核定東至崇文門大街迤東西至慕盤街迤北將宗人府吏戶禮兵工部並包在內擬令遷移悍然不顧尤可異者堂子爲祭祀重地英薩使已久踞先經面詰伊允事定退還昨又晤詢則又云須由伊國家作主頃詳具說帖駁論數百言伊等亦置不復可不謂磨難乎至賠款私議約五萬萬兵費及商教各欵在內連利已逾七萬萬英使及赫德欲將漕鹽常稅歸洋員整頓竊計每年亦無一千四百萬之多各使意見不一或謂須借總債歸還但無押欵可指僅以漕鹽常稅作押恐人不信此又大磨難之一端未必專因俄約延宕觀望慶李肅印正月

十八日午刻到

查垂詢磨難者何事係十六所發銑電中語  
今來電誤作諫電想係筆誤或一時誤記

六光緒二十七年正月十八日下午十二點三十分北京發

火急官報西安軍機處頃接烟台轉增祺元電初八奉宋電即分轉清晉壽據探初五俄隊已由義州起程截營子壽帶隊千餘赴庫魯被蒙團擊回現至新民廳屬前央溝邦子擊殺俄官之金壽山股匪亦隨其後十一俄將云被壽函所激擬數道攻壽晉並索微弁同行免得百姓逃散當同各部學政等力爲勸阻言奉國命不能止十三已開行因聖容玉寶均在庫魯即派侍衛富呢雅幹等隨往俾資保護兼沿途和解免地方爨爛壽尙有擅殺勒捐諸惡人怨沸騰屢爲地方稟揭現飭各營如壽不卽遵旨回京再圖生事卽行擊解餘再奉聞云請代奏奕効李鴻章皓印正月二十日申刻到

七光緒二十七年正月十九上午十點三十五分北京發

火急西安軍機處奉天將軍增祺前因奉省淪陷糧餉無資商經鴻代向華俄道勝銀行議借銀三十萬兩暫濟目前訂八釐息一年歸還年前撥過銀八萬

兩茲又以盜賊遍地釐稅無收兵民需餉尤亟電請轉奏仍由該行提借銀二十萬以濟眉急等語查所請撥款係在奏明三十萬兩之內除仍飭道勝銀行籌備電知奉省照撥外理合奏明備案請代奏奕効李鴻章效印正月二十日申刻到

八光緒二十七年二月二十二上午八點北京發

中國火急官報西安軍機處效電諭旨俞廉三教案全結應免置議當即派員往商法使彼謂前辦聯銜照會衡案尙未結今得漢口領事電知已妥結俞撫自可免議至前江西巡撫松壽原註云遵奉朝旨引火燎原所派委員以招兵爲詞聚衆焚掠教堂罪應革職永不叙用其稱所派委員招兵聚黨焚掠教堂想係確有所指容再查詢係何國使臣主意相機疏解未知能革留了事否請代奏奕効李鴻章養印二月二十二日申初到

九光緒二十七年二月二十二日下午五點北京發

中國火急官報西安行在軍機處法使照稱此次拳匪兆亂京內教會之教堂

養病院育嬰堂以及學堂墳地均被焚燬請派大員會同駐京主教議定賠款辦法早爲清理彼此有益等語又和約第四欵中國國家須在各國人民墳塋曾遭汗瀆發掘之處建立碣碑以昭滌垢雪侮之意亦應派員迅速照辦並令議訂善後傳教章程以期民教相安擬請旨飭派前內閣侍讀學士張翼直隸布政使周馥專司其事仍隨時呈明臣等核辦祈代奏奕李養印二月二十三日午刻到

十光緒二十七年二月二十四日上午十點十分北京發

中國火急官報西安軍機處效電諭旨飭商松壽兪廉三處分兪廉三已商准免議於養電奏明松壽原註情節稍重竊慮各國不肯鬆口亦不得不相機疏解因探法人畢盛人尙爽直江西教案法國亦多遺員與之詳晰開導彼謂江省究未殺害教士情有可原允出知單與各使商論頃據函復均經畫諾允從輕辦似革職留任可以了事堪紓宸廑原摺單係十八日由驛六百里拜發計月底可到務祈酌定明降諭旨將兪撫扣除松撫改輕劉撫榮藩照前電酌辦

其餘按照註語可允者即行照允以免駁回饒舌致礙和局現議賠款數尙未定俟議定可陸續撤兵兵早撤一日費即省一日日賠兵費百萬月計三千萬我欲其速彼則願拖愈遲愈不合算請代奏奕効李鴻章敬印二月二十五日予刻到

十一光緒二十七年二月二十四日下午六點二十分北京發

西安軍機處前因楊儒病亟請代已商俄使電請外部若派新使可否接待據格使稱外部復電楊雖病現無交涉要事儘可照章令參贊代辦頃奉諭電旨擬調呂海寰前往接替著與俄使商明允否接待又往詢格使格謂外部前復甚明楊請假赴德奧調理仍可令參贊代辦若遽換人外部必不願允否接待不敢過問云此事似可緩辦請代奏奕効李鴻章敬

十二光緒二十七年二月二十七日下午四點北京發

急西安軍機處法使以劉光才一軍駐紮井陘縣東過於相逼必欲劉軍先退方肯撤兵已五次電致晉撫月二十五日德瓦帥擬添兵由獲鹿進攻法使勸

阻頃又據美使來告瓦帥擬二十九日由京派兵千餘會合保定德兵西進初一約派保大隊繼進德法合兵勢不可當非獨晉省遭災更恐牽動保定請速飭劉軍退繁山西境內如我退彼進尙可有詞詰責否則實難阻止事機甚迫急須早圖爲妙窺其進兵之意或因此次爲俞松兩撫事力與磋磨賠款及使館界停考等事均未定議彼意在速行辦結不耐駁辯之煩事關和議成敗謹據實電聞請代奏奕効李鴻章沁印二月二十八日子正到

十三光緒二十七年二月二十九日上午八點四十分北京發

中國火急官報西安軍機處沁電敬悉十國使難遍晤已臚列敘來電照會惟該使等於懲辦首禍持之甚堅年前爲爭論數人幾致決裂此次雖再竭力辦駁未知果能保全並肯速議他欵否得復再達至東三省晉昌等四員皆專爲聳教案所擬已重俄爲鐵路即在有辭似不至再加重俄使於上屆懲辦禍首暗中維持頗多也慶李豔印二月二十九日申刻到

十四光緒二十七年三月十四日下午四點十分北京發

火急西安軍機處文電悉月朔法英德日本四使約那桐徐壽明周馥赴德館  
討論賠償抵款稱賠款須四萬五千萬兩答以太多則稱各國祇索實用之數  
並無虛開旋問中國究有何款可以作抵答以賠款數目太鉅甚難籌畫海關  
稅因鎊價今昔懸殊擬按鎊價加收以作抵款於洋商無損於中國有益各使  
稱伊等亦有此意但驟難商定須另籌切實抵款隨遍問鹽課常稅折漕土藥  
並開辦印花稅房捐等項答以舊有之款均有要用新籌之款驟難辦成惟賠  
款總不能不籌竭力騰挪連海關加收每年至多能籌至一千五百萬兩各使  
稱如此則須六十年方能攤完伊等擬請每年籌付三千萬兩三十年可完按  
借債周息五厘二十年本利相平四百五十兆三十年成九百兆計周息三厘  
三毫有零利息尙不爲重答以分三十年畢畢款實難籌各使又稱內中尙有  
一二國願得現銀者可否商借現銀付給答以中國情願攤還不願借債是日  
各使相約因赫德前曾分送節略臚列京外各費款及改革辦法該使等欲借  
面談考證並非與那桐等議事及告以累年入不敷出暨切改革爲難情形各

使稱俟再商而散嗣臣鴻章晤英美日本等使均屬將賠款大減美國政府謂中國力量不過能賠至三萬一千萬兩爲止擬向各國勸減但須籌備現銀英使則稱四百五十兆兩可作準數日本使則以洋貨加稅爲是但稱必須英國肯允詢之英使則稱中國稅章將來必須大改莫妙於將釐金及土貨出口稅全行免去專徵進口洋稅此豈一時所能辦到臣奕効面詢赫德據稱各使意見不一有願聽攤還者有願索現銀者如付現銀必須借債付四百五十兆之欵必須借六百兆方能敷用以周息四厘計之三十年須加息七百二十兆大不合算又稱斷不可以抵欵難籌推託恐各國借口佔地自籌爲害尤大各約須至四月底方與全權會議莫妙及此閒暇先與政府戶部各督撫通盤籌畫速定大計總期能指有的欵作抵先辦撤兵最爲要著至自用無論如何爲難於撤兵後另籌則不受加費之虧若俟會議時再行往復籌商各督撫意見不同多煩商酌恐議論未定而賠費又增數千萬矣所言極爲有理正擬電奉請旨敕下戶部及各督撫力顧大局通盤徹籌以解倒懸之急適接軍機處來電

謹將籌議情形據實陳明除電江督湖廣督外請代奏奕効李鴻章願印三月十五日丑正到

十五光緒二十七年三月十七日上午十點五分北京發

火急西安軍機處元電悉長安街及兵部街等處雖劃在使館界內惟長安街已議明仍作公共街路聽車馬任便行走東華門沿城根順東長安街出前門不至阻隔慶李篠二三月十七日申刻到

十六光緒二十七年三月十七日上午十點十五分北京發

火急西安軍機處咸電旨咸電並悉海關洋稅初借俄法債即以作抵嗣借英德債亦不敷抵故另指鹽貨釐局七處是洋稅早已抵去現欲再抵賠款斷辦不到至加稅是日後之事一時未能議妥以賒抵現其誰信之按各國現索賠款四百五十兆兩按周息四釐計算每年須銀一千八百萬兩略帶還本便須銀三千萬兩若鹽漕常稅一概不准牽涉此外更無款可籌各使爲我設法提及亦屬萬不得已尙無侵我利權之意慶李篠三月十七日戌刻到

十七光緒二十七年三月十七日下午四點四十五分北京發

火急西安軍機處各使館擴充地界甚寬界內佔用民地前據照會請歸中國付價當經駁覆以地歸使館佔用應由使館付價即按公法戰勝亦不能強奪民產乃各使總以因拳匪攻館伊等得有自主防守之權強詞爭執駁論數次堅不允從失產之人情甚可憐祇可從權派員勘地驗契酌給價銀以示體恤除備文咨達外慶李篤印三月十八日丑正到

十八光緒二十七年三月十八日上午九點十五分北京發

火急西安軍機處盛京戶部侍郎清銳頃遵旨到京請代奏奕劗李鴻章巧印三月二十日未刻到

十九光緒二十七年三月十八日下午二點三分北京發

火急西安軍機處盛京戶部侍郎清銳頃遵旨來京已於三月十七日到京慶嘯三月二十日未刻到

二十光緒二十七年三月二十一日下午十二點三十分北京發

火急西安軍機處諭電悉前據各使照會停考地方開單前來所開直隸省北京順天保定天津順德河間各府遵化冀州通滄景永清望都獲鹿朝陽文安武邑灤平等縣張家口新安鎮兩處山西省太原大同汾州朔平澤州潞安等府忻陽絳等州太谷孝義曲沃大寧河津岳陽文水壽陽平陽長子高平絳縣平遙潞城洪洞等縣歸化綏遠二城河南省南陽陳州彰德等府鶴壁光州河內滑縣太康襄城西華浙江衢州府山東泰安府湖南衡州府清泉縣陝西寧羌州江西鄱陽縣東三省盛京甲子廠連城于慶街北林子呼蘭城等處曾經備具說帖照會請照原條款分別滋事城鎮不得統指府州縣致良莠不分旋據照復斥爲欺罔迂謬實無情理可說現在與辯駁俟定議即行具奏慶李馬印三月二十一日亥刻到

二十一光緒二十七年三月二十二日下午五點北京發

急西安軍機處昨各使照會賠款共索銀四百五十兆兩上下並引總綱第六款所載擔保如何賠補之語請聲明承認此數並指明如何擬籌理財辦法清

還欠欵等因查賠欵以速定爲妙聞各使已擬定息銀照加一倍共須九萬萬兩爲數甚大另籌理財新法斷難濟急擬以鹽課釐每年銀一千萬常稅三百萬釐金二百萬共一千五百萬分三十年還清不提及加息並以中國財政入不敷出前三項皆我度支要需勉強騰挪虧空更鉅請允將洋商貨稅酌加三分之一稍資抵補所加有限彼或不爭免釐較有實益似此辦法與前奉洽電尙屬相符尊處如以爲然擬即照復商辦明知彼難依允且俟第二次來晤必提加息再與相機磋商至減數一節亦擬竭力商酌肯允與否實無把握祈速復勿誤慶李養印三月二十五日酉刻到

二十二光緒二十七年三月二十三日下午三點五十五分北京

火急西安軍機處帶電悉德瓦帥前聞有董福祥率兵來直之說兼以宣大境內土匪與教民爲難派隊偵探現知董事係謠傳已將游騎撤回尊處當已得信惟張家口西北教民仍屬驚惶略留小隊彈壓並不深入請勿過慮慶李漾

印三月二十六日申刻到

二十三光緒二十七年三月二十四日下午二點四十分北京發

火急西安行在軍機處治電悉當即函商赫德茲據覆稱江漢關何稅司實有不得不更調之故是以即須前赴瀘州新任賀稅司明幹老成一切關稅交涉稽查會匪等事必能籌辦妥洽等語希即專電鄂督查照慶敬印三月二十六日戌刻到

二十四光緒二十七年三月二十四日下午六點北京發

中國官報西安軍機處聯軍撤兵之前奏准酌調袁馬兩軍應先期調到彈壓地方辦理善後事極繁要須有熟悉情形大員聯絡布置候補侍郎胡燏棻軍務洋務均極諳練現屆假滿已電調來京襄助一切請代奏奕効李鴻章敬印三月二十七日卯刻到

二十五光緒二十七年四月十二日下午三點五十分北京發

中國火急官報西安軍機處停試五年一節英薩使持之甚堅與商分別城鎮不允與商一府只停首縣生童應試府城仍開考亦不允不得已只商京城會

試及順天山西鄉試仍不允周馥向法美俄各使談及語氣尙鬆爰擬具節略免致一再給領銜照會日久不復昨薩使語徐壽明停試與懲辦禍首載在和議總綱第二第十兩欵前於照會內言明非第二第十兩欵辦完不能撤兵徐答以鄉會試所考確係各省各府不滋事地方之人與第一欵原議不悖薩稱前已說過北京太原爲戕害凌虐諸國人民最甚之處如此二處仍可開考別處更可不論且欵內載明不得舉行考試北京會試鄉試何得仍欲舉行此節可不必議又催問第二單內請辦各員告以單開各員各省皆有查復需時薩稱查辦單不能即辦懲辦單內尙有若干未辦告以懲辦單亦有漏開姓名且是否相符京須復查薩稱情節均已訪確無須復查漏開姓名者自應查詢其餘亦尙有若干未奉諭旨已奉諭旨者與原請罪名不符前請重降諭旨係以未見照辦告以已咨軍機處請旨現在賠息銀均照所請似可先行撤兵此等事不問撤兵與否可隨時商辦薩稱上兩項既早有文知照非辦結斷不能撤無論何國兵撤去英必不撤又問此二事數日內能辦結否告以不能停試事

尙有未復照會未准領銜回復即得復後具奏摺到西安亦須十餘日此事欲速不能薩云可惜告以請辦各員單內所餘無幾停試一節應停各處非議定不能開考務望於領銜知照中國認息後即電請政府撤兵不必拘泥薩稱伊係拘泥出名者似此情形若非將第二第十兩欵辦完薩使決不肯允撤兵薩性情執拗頗難與商前爲劉撫等事語氣已稍活動乃又於回文內改變與所請暫候改發各員均請重降諭旨業經由驛咨請尊處酌辦並將第二單未辦各員迅速請旨其停試一節如實不能爭擬即具奏鄉會等試或可借聞舉行似不值以此牽礙撤兵要務也慶李元印四月十四日卯刻到

二十六光緒二十七年四月十四日下午六點四十分北京發

火急西安軍機處戶部津沽洋兵未撤鐵路暫難交還滻存漕米江浙委員無法運京若再遲回年前恐現米昨託赫德代覓洋商包運由滻收徑運到倉交每石需銀六錢之譜輪船火車及盤運雜費均在內封河前運完核與向年辦運需費較省江浙有專欵不須另籌照此試辦因時間制宜有利無弊遵處裁

奪電復以便定議慶李戶部鹽四月十五日未刻到

二十七光緒二十七年四月十五日下午五點北京發

西安軍機處奉真電旨即照會德穆使頃據照復大皇帝降旨允諱償聯軍兵費等銀四百五十兆加利四釐聯軍總令部瓦帥即撤謹留一枝約數千人等語穆使曾言保定京城兵先撤其數千人均係暫留天津債票辦法可商抵款年期尙待酌議請代奏奕効李鴻章咸印四月十七日亥刻到

二十八光緒二十七年四月十六日下午五點十分北京

西安軍機處醇親王赴德一事正月咸電已詳陳昨德穆使因賠款息銀議定欲催早去頃接呂使覃電德君以專使現可舉行屆書必優禮接待應請降旨特派醇王爲頭等出使大臣並令前閣督學張翼副都統廩昌隨往贊助一切臣等猶慮該員等情形未熟與瓦帥商酌添派德員隨行德君性急醇去恐難遲緩可否令其不必遠赴行在請訓致需時日國書禮物即代預備瓦來辭行定明早起訂先赴日本其兵隊約兩禮拜後可陸續撤回並附問請代奏奕効

李鴻章諫印四月十七日酉刻到

二十九光緒二十七年四月十六日下午十二點二十五分北京發

火急西安軍機處前覆羅使頃接羅咸電遼致瀾云續單已及大半餘亦趕辦  
祈即告各使賠款辦法亦祈與各使商酌云仍覆令商瀾撤兵慶李諫印四月  
十七日申刻到

三十光緒二十七年四月十七日下午六點北京發

西安軍機處初四日爲各使照會請重降諭旨所發咨文計已得達茲再聲明  
各使來文汾州府知府徐繼孺忻州府知府徐桂芬和林格爾通判毛世黻托  
克托城通判樊恩慶寧遠州司獄李鼇和屬歸化城同知郭之樞前武邑縣知  
縣張秉哲盛京副都統晉昌巴彥蘇蘇統領鄂英衡州道隆文金衢嚴道鮑祖  
齡共十一員應照原擬斬監候如貸其一死極輕當發往極邊永不釋回請重  
降諭旨等語今早因議賠款晤英薩使據稱伊國家於此事甚爲著意請速查  
照原文酌辦劉樹堂事與薩再四商論可免查抄仍請交地方官管束榮銓前

已允刪除永不釋回四字至張秉哲於署清苑任內已革職永不叙用武邑滋事並不在任仍應扣除薩謂只要停考及懲辦外省禍首二事辦法即行撤兵並無他故停考昨已由驛奏結廷會試已允不停奏到請即降旨懲辦事可否俟咨到酌請降旨一面由電示知以便催其撤兵請代奏奕効李鴻章簽印四月十八日辰刻到

三十一光緒二十七年四月十七日下午八點北京發

西安軍機處咸電悉英薩使所擬每年付銀二千六百萬兩三十年賠款本利全清雖總計付息較少但財力實難周轉查俄英德各債須光緒六十九年始能還清若添新債過多無法騰挪今早與專辦賠款之德英法日本四使會議告以每年一千五百万分五十年前三十年付本後二十年還利各使謂欠利太久斷不能行旋以四十年清還每年付銀二千零四十餘萬辦法與商取表一紙示知照表分年攤算前十年雖付利較少後三十年本少利減而所付銀數仍同以後補前各國亦不吃虧各使謂前十年少付之利應再行加利告以

利上加利斷不可行各使言伊等有一辦法四十五年清欵明早算一表來許以送到再酌賠欵但不欠息彼即無詞惟前數年若只付息則本銀絲毫不減而利銀已付數千萬兩大不合算總以付息抵本年分略寬財力得抒而總計息銀數目仍不過鉅容與竭力磋磨爭得一分是一分隨時電商辦理慶李篠

二印四月十八日未刻到

三十二光緒二十七年四月十九日下午四點三十分北京發

西安軍機處洽電令從權變通辦理遵即恭擬諭旨照會各使文曰四月十七日內閣奉上諭前因盛京副都統晉昌巴彥蘇蘇統領鄂英湖南衡永郴桂道隆文浙江金衢嚴道鮑祖齡山西汾州府知府徐繼孺忻州知州徐桂芬署歸化城同知郭之樞和林格爾通判毛世黻托克托城通判樊恩慶寧遠州司獄李鳴和等縱匪仇教致釀事端降旨將晉昌鄂英發往極邊充當苦差隆文等發往極邊永不釋回該員等獲咎甚重本應按律擬斬監候旣經朝廷加恩貸其一死改發極邊已屬從輕辦理著刑部查催迅速定地發配毋任延宕至浙

江巡撫劉樹堂前已革職永不叙用飭令回籍仍著交地方官管束以示懲儆  
欽此內除榮銓張丙喆二員業經商明毋庸贅敘外餘均查照原照會大意似  
已滿其欲儘可不必答復請即由行在京城兩處發抄至眞電所商並業經照  
會未復各國現令徐壽明周馥詳細開單與各使磋商俟覆到再行詳細電聞  
以便降旨似不待全案了結即可撤兵停試奏到仍盼電示請代奏奕効李鴻  
章效印四月二十日丑刻到

三十三光緒二十七年四月十九日下午七點三十五分北京發

西安軍機處嘯電悉道歉二字似不必用轉落小樣巧電旨到遵擬國書一通  
請代呈御覽酌定候復即繕慶李效恭擬國書全文如下大清國大皇帝敬致  
書於大德國大皇帝陛下朕維中國與貴國訂約以來信使往還輯睦無間前  
歲貴國親王來京朕疊次接見情誼尤爲欵洽乃上年五月義合拳匪闖入京  
師兵民交鬪貴國使臣克林德竟至被戕殞命該使臣衝命來華辦理交涉事  
件悉臻妥協朕甚嘉許不意變生倉卒遽爾捐軀朕自維薄德未能先事預防

保護多疏疚心曷極已於該使臣死事地方敕建銘誌之坊用以旌善澤惡昭示後來茲派醇親王載灃爲欽差頭等專使大臣親齋國書前往貴國呈遞該親王分屬近支誼同休戚特令竭誠將命以表朕慚悔之意又此次貴國勞師遠涉戢匪安民和議早成生靈無恙尤徵大皇帝顧全大局並令該親王代朕道達謝忱惟望大皇帝盡棄前嫌益敦夙好從此我兩國共享升平之福永聯玉帛之歡惟大皇帝鑒察焉印四月二十日酉刻到

三十四光緒二十七年四月二十日上午八點二十分北京發

火急西安軍機處翰林院檢討吳式釗前經掌院奏參交本籍監禁昨據義使爲之解說尙未及辦茲又據英薩使函稱吳式釗爲本國福公司聘用無故被羈請咨行該省釋放等語查英義福公司前請採辦晉豫煤鐵經總署奏准嗣汴無奏調吳式釗前往聯絡該衙門不知原委輒加參革迹近謠罔可否請旨敕下雲南督撫即日釋放以昭公道請代奏奕効李鴻章號印四月二十日申刻到

三十五光緒二十七年四月二十日下午五點四十分北京發

中國火急官報急西安軍機處前致羅使電謂德允撤兵英豈宜獨後頃接羅皓電稱遼切致瀾云已有訓條陸續撤亦與各國相同惟全撤日期應以中國辦結各端遲速爲斷如續單辦罪之類等語云請代奏奕効李鴻章審印四月二十一日子正到

三十六光緒二十七年四月二十三日下午七點二十五分京北發

西安軍機處嘯電垂詢日本優榮之典如何辦理令即酌擬查前駐使西德已商請派侍郎那桐現使小村又云已電商該外部擬請旨即行酌派能否賞加頭品頂戴以示寵榮至養電垂詢各節查京師各使館酌留兵隊現尙未定數租界擴充業經定議彼擬築城自固並未聞設礮台之說如有其事自應商阻察看日本美兵官護禁城嚴禁中外人出入十九夜武英殿之災救護甚力幸未延燒其忠於爲謀即此可見鐵路兩條蘆漢暫係法國代管津榆暫係英國代管彼因洋兵尙未盡撤便於往來起見已屬俟回鑾時小心伺應斷無他慮

但停止此舉藏內之人無憑或挾前恨或生以上六條皆臣愚昧之見謹繕寫他端可爲此也俟其使到再當明論而定之

奏摺伏候聖裁謹奏雍正三年二月初七日具

硃批逐條批來矣

南坪壩事件已令岳鍾琪安撫摺

太保公四川陝西總督臣年羹堯謹奏爲遵奉上諭事本年二月十七日由驛齋到御批臣摺臣敬謹開看伏讀聖諭駕馭土司安撫番蠻之道悉中肯要洞照隱微實至當不易之理也臣與岳鍾琪竭力奉行務求寧謐以答聖恩至南坪壩之事臣又速行岳鍾琪轉飭早爲安撫不得殺及無辜諒亦計日可以安貼惟是此案起釁之由臣與王景灝亦各想到監工官弁或有生事而未得其實據現在會同密查若果激變有因臣等必從重參究以爲擅啟邊釁者之戒今因奉到聖諭理合先行奏明謹奏雍正三年二月二十二日具

硃批著實嚴察參奏重處此必有之事原從公斷以安無知野人之心並不干係長外夷刁風之事也

奏報遵旨留兵駐守查木多摺

太保公四川陝西總督臣年羹堯爲遵旨奏明事本年二月二十三日由驛齎到御批臣摺臣敬謹開讀內有西藏撤兵查木多不可無兵彈壓之聖諭周詳明晰瞭如指掌臣謹遵旨議得周瑛撤兵之日應將雲南之兵留一千名暫駐查木多或以總兵或以副將管領此兵並於中甸駐兵數百名以爲查木多聲援俱行文總督高其倬提督郝玉麟揀選派委酌量辦理郝玉麟帶雲南兵五百名與周瑛會同踏勘分管界至事畢由裏塘回滇再查川省兵馬現今在藏與查木多乍了巴塘裏塘防汛者共二千八百餘名周瑛撤兵之日令其於此兵內留三百名駐防乍了留三百名駐防巴塘各令遊擊一員管理周瑛帶四川兵五百名會同郝玉麟踏勘分管界至事畢即暫駐裏塘以資彈壓兩省兵糧照舊令本省委員分運供支其餘兵馬不在派留之數者仍先行撤回原汛至駐藏之員外郎常保等或隨兵撤回或俟明年春夏撤回之處統聽聖裁臣謹議奏以聞雍正三年二月二十八日具

硃批知道了常保亦應撤回

謝恩摺

太保公四川陝西總督臣年羹堯謹奏爲恭謝天恩事本年二月二十四日陝西巡撫石文倬到陝口傳聖諭大將軍若在軍前辦理軍務自當照大將軍體統行事今既在省城你到去仍照督撫平行下旨與年羹堯欽此臣跪聽之下伏思聖主施保全之恩於臣者無微不至凡有關於臣身之事無不明白指示臣敬謹遵行於一切接見文武官員悉仍照總督儀注不獨臣心得以安然而大眾觀瞻亦覺處處妥貼硃批更  
應如是臣實懼忭無已感激難名謹繕摺恭謝以聞雍正三年二月二十八日具

謝罪摺

太保公四川陝西總督臣年羹堯爲遵旨回奏事雍正三年二月二十四日陝西巡撫石文倬口傳諭旨云你下旨與年羹堯怎麼連他也不知道朕呢着他回奏欽此臣跪聆之下悚惶無地欽惟我皇上聖明天縱御極以來恩無不週

威無不服利無不興弊無不革與夫愛養臣工加惠百姓此天下臣民所共知非獨臣一人知之也臣自蒙恩教養已歷多年當聖祖仁皇帝時臣每有愆尤以至獲罪輒蒙聖主矜恤教誨迨雍正元年以迄於今過沐天恩委任爵以上公兩給世職賜予稠疊寵榮異數自古所無臣雖至愚而感銘五內寤寐不敢忘報此心之篤信固守一念不移臣實自知不讓於他人今驚聞傳諭恐懼汗流此必臣之愚昧有不能仰體聖懷宣揚聖德之處伏祈弘慈寬宥仍賜明白指示硃批還要如何明白指示使臣得以亟圖改過不致徬徨莫措是在聖主格外之恩施也硃批徬徨莫措亦自信不及耳如果知恩何罪可待臣不勝悚惕待罪之至雍正三年二月二十八日具

蔣洞未清錢糧遵旨代爲完結摺

太保公四川陝西總督臣年羹堯爲遵旨代完錢糧仰祈睿鑒事竊惟陞任涼莊道蔣洞經手未清錢糧奉旨令臣設法代爲完結臣查蔣洞任內經手錢糧惟康熙六十一年分因巴里坤軍前需糧孔亟蔣洞支領帑銀即分給運戶陸

續輓運繼因肅州無米凡已給運戶銀兩未能繳還除追取運戶及蔣洞賠完  
外尙欠肅州軍需銀六萬三千五百餘兩原係庫內正項錢糧自難寬免今既  
奉旨令臣設法完結臣前經營西安捐納每收捐糧一石原有羨餘銀十兩自  
雍正元年夏季起至雍正二年秋季停捐止共銀二萬七千兩本年布政司平  
規銀一萬兩臣兼理河東鹽政本年鹽規銀二萬七千兩可以清結蔣洞未完  
之項但蔣洞給發運戶之銀尙有九萬餘兩未曾追繳目下巴里坤兵米猶須  
輓運若將此九萬餘兩概予豁免恐啟運戶悞糧欠帑之刁風臣愚以爲運戶  
之中果係貧乏力不能完者從寬免追如有身家殷實之戶應令地方官如數  
查追解往西寧爲建築邊城之用庶幾蔣洞免急公之累運戶無欠帑之風而  
於邊城亦不無小補株批此項犯不着寬免與  
蔣洞無涉也應追者理合繕摺奏明以聞雍正三年

三月初三日具

硃批知道了

謝恩摺

太保公四川陝西總督臣年羹堯謹奏爲恭謝天恩事本年二月三十日理藩院侍郎臣鄂賴奉旨到陝口傳聖諭凡西藏西海一切蒙古事宜臣欽遵領悉與鄂賴詳細商酌陸續辦理另摺奏聞外又鄂賴口傳密旨訓臣以改過自全之道臣跪聽之下感入五中涕泗交流知所云自今以往益加奮勉以贖前愆所自惜者臣自受職以來二十餘年食祿圖報不知量力而爲之至於今日心血耗損已極精神日見短少殊批你不用朕教誨你若臣當時時遵守聖訓盡此心力再不得短少而任大責重惶悚無地惟懇聖主鑒察臣心頻施教誨硃批你不用朕教誨你若臣當時時遵守聖訓盡此心力肯自己教誨儘足用矣臣當時遵守聖訓盡此心力以求始終保全已耳謹繕摺恭謝以聞雍正三年三月初三日具

硃批你身子病弱之言鄂賴亦奏但范時捷來時你託他奏朕之言有此一言入耳凡有言及你病者朕皆難信矣况你再不得病不用這些作爲君臣彼此徒寒心耳

奏明蒙古等來京令由邊外行走緣因摺

太保公四川陝西總督臣年羹堯爲遵旨回奏事本年二月三十日理藩院侍

郎鄂賴到陝口傳諭旨西海蒙古等三年來京朝覲一次由邊外行走之事朕意由內地行走與邊外行走皆屬一樣無甚關係年羹堯或另有所知妨礙之處著伊自行密奏欽此臣愚以爲陝省屆在邊陲不可使蒙古深知內地之路徑且往來日久或偷買違禁之物或跟隨人等與內地人民口角生非或有無知之人誤以訛傳恐嚇煽誘皆不能不慮及於此是以臣之原議欲令其於邊外行走謹將臣之愚見據實奏聞伏候聖裁謹奏雍正三年三月十二日具硃批當日一時之見雖是凡事不可固執今見衆論未免外遠他們反生疑畏之論似有理但你奏定十三條之事朕不便更張此事你當酌量請旨仍復舊例似妥我只當你另有所見若不過爲此謹慎些可以不必也

再青海按月限貿易一事聞得他們亦甚不便亦當與岳鍾琪酌量復奏朕已有諭與岳鍾琪矣

你實在昏憒了胡期恒這樣東西豈是年羹堯在朕前保舉巡撫的人豈有此理你忍得如此待朕朕實愧而下泣即此字朕實含淚對燈書成者時常將頭

抬一抬將心撫一撫朕亦時常如此自問也

楚宗奏允祿在大同兵民賣買人俱稱賢王曾概感激而其下人逐日射箭嬉戲毫無爲難之色問其何以致此皆言一切交易上下人任買賣人之價取與因此而得名等云云與你之聞見何如你與允祿來往字跡光景言辭怎麼樣若有存留者送些來看允祿見楚宗時放肆無禮出言不遜之至朕已明諭在廷王大臣等想你自然亦得聞也亦發來你看據實奏聞朕原有諭諭你恐你的兵弁人等被他愚去欺你這光景似應朕諭矣

奏明參劾胡廷選緣由摺

太保公四川陝西總督臣年羹堯爲據實奏明仰祈睿鑒事竊查甘肅提標守備胡廷選經臣以行止不端題參緣提標兵丁征防巴里坤例給馬乾銀兩扣存司庫臣以兵丁遠勞口外而扣其額設馬乾有違定例於雍正元年二月內咨明戶部請給於五月內接准部覆准支隨行鞏昌布政司照例支給而提臣路振聲令胡廷選於十一月內赴司領銀五萬兩即在蘭州交千總俞汝珍銀

三萬二千指稱支領馬乾一事進京打點臣在西寧訪聞隨調胡廷選訊供是  
實又提訊兪汝珍據供奉提督差遣賚銀進京交兵部書辦朱增祚銀二萬七  
千兩還舊欠銀二千兩其餘銀三千餘兩交客人張篤天等會至肅州等語臣  
即咨提朱增祚到西安據供收過金子一千兩金剛鑽一兩三錢並紗綬羊絨  
銀子共算是二萬四千兩質對相符若遽參究詞連提臣路振聲所關甚大是  
以臣於去年冬間面奏請將胡廷選從輕參革兪汝珍咨斥以警將來荷蒙聖  
主俞允臣回任之後將胡廷選以行止不端題參奉旨胡廷選著照該督所奏  
革職調來引見欽此除將胡廷選於三月十九日自西安給咨送部外謹將參  
劾緣由據實備陳仰祈聖鑒今於朱增祚名下已追出金一千兩金剛鑽一兩  
三錢銀六千六百七十五兩收貯西安司庫尙少銀六千二十五兩朱增祚自  
限四月內變產完繳但金子與金剛鑽俱係胡廷選兪汝珍經手兌換若行變  
賣不無折耗且尙有無著銀兩應向伊等追償則胡廷選引見之後仍請皇上  
勅部發回陝西清結此案庶便給散出征兵丁理合一併奏聞雍正三年三月

二十一日具

奏明因精神不足辦事不能周到摺

太保公四川陝西總督臣年羹堯爲據實奏明事竊臣向有心跳之病去年臘月忽然舉發較往日頗重范時捷起身時臣託其代爲奏明是實自入春以後臣因飲食減少夜不能睡於二月初一二三等日吐血數次漸覺頭暈雖力不能支而亦必勉強辦事稍有餘閒即加意休養以求痊愈惟願長爲盛世之犬馬冀得永遠効奔走之勞今病已漸退而瘦弱特甚精神不足殊批六極惡弱原係一事若不  
爲善日強亦當自省也臣所辦之事止覺踈漏不能周到是以於謝恩摺內附陳病狀欲求聖主知臣爲病所累凡料理不妥之處俯賜矜宥殊批如有不要豈可矜宥  
此席乃列祖之神器朕何敢私此是臣之私衷臣之下情非藉病推諉而於事不盡心竭力也聖明在上臣固不敢有意作爲自取罪戾聖恩之於臣如此其極臣亦實不肯有所作用以自蹈於天地鬼神之所不佑硃批共誅伏祈聖慈垂鑒謹據實具奏以聞雍正三年三月二十一日具

奏謝調補杭州將軍摺

太保公四川陝西總督臣年羹堯謹奏爲恭謝天恩事雍正三年四月十八日准吏部咨文奉旨着臣調補杭州將軍臣跪讀諭旨感入五中殊批若不實隨感非人心也恭設香案望闕九叩繕疏奏謝天恩伏念臣以庸碌之資而當封疆之任又值久病昏憊日增辦事錯謬非止一端罪謫所加分爲應得乃蒙聖主教誨詳明切中臣病臣得自知悔艾殊批我君臣二人已爲恩出非常殊批若仍如常朕原有旨且不使終於廢棄寵命殊批自此受寵若驚方可法大臣之下頒令臣爲杭州將軍曲賜保全既免貽悞於封疆臣亦得因事簡而調治似此殊恩臣身受之殊批朕臣心知之殊批汝而口不能盡言惟有愛惜軀命殊批朕實一字也道不出惟仰面視天耳勉供厥職効犬馬之餘力冀圖報於萬一雖經具疏奏謝天恩而感刻之私此衷仍難自己謹再繕摺恭謝以聞雍正三年四月二十二日具

硃批朕聞得早有謠言云帝出三江口嘉湖作戰場之語朕今用你此任况你亦奏過浙省觀象之論朕想你若自稱帝號乃天定數也朕亦難挽若你自不

肯爲有你統朕此數千兵你斷不容三江口令人稱帝也此二語不知你會聞得否再你明白回奏二本朕覽之實實心寒之極看此光景你並不知感悔上蒼在上朕若負你天誅地滅你若負朕不知上蒼如何發落你也我二人若不時常抬頭上看使不得你這光景是顧你臣節不管朕之君道行事總是譏諷文章口是心非口氣加朕以聽讒言怪功臣之朕亦只得顧朕君道而管不得你臣節也只得天下後世朕先站一個是字了不是當要的主的主意大悖謬矣若如此不過我君臣止於貽笑天下後世作從前黨羽之暢心快事耳言及此朕實不能落筆也可愧可愧可怪可怪

恭繳密旨摺

太保公四川陝西總督臣年羹堯爲恭繳密旨事竊臣於雍正元年赴京陛見因貝子允禩之事蒙聖主付臣密旨臣捧齎回署敬謹奉旨令臣封固繳送臣謹親視原封另匣恭繳謹繕摺具奏以聞雍正三年四月二十二日具

硃批知道了

請假半年養病摺

太保公杭州將軍臣年羹堯謹奏爲據實自陳事本年五月初五日由驛賈到御批臣摺敬謹開讀訓諭諄切指示迷途臣伏地嗚咽不能起立伏念臣自蒙知遇以來受恩獨異於等倫犬馬之結誠惟聖主之知臣最深即臣之私心自誓亦斷不肯上負聖恩爲從前結黨者之所暢快無如臣苦不自知言行乖謬日甚一日自以爲是不知改悔由小過而大過由小罪而大罪將必至於不可赦宥雖欲不負聖恩而法難寬雖欲不爲人所暢快而亦不可得皇上洞照隱微曲賜保全凡有所聞即以下詢凡有所見即以申飭臣獨何心能不感刻海內之田夫野老尙知探聽聖躬安和以爲欣慰而自春及夏聖躬萬安未示臣知臣獨何心能不愧悔畏聖主之明感聖主之恩力圖遷善以贖前愆雖已往之不可追而自茲以後果能歛退謹密必始終受恩使千秋後世知聖主之於臣子卽昏憤如羹堯者亦必化誨裁成保全到底此臣之所以心悅誠服感激之外無他念也若敢口是心非則天地之所誅滅臣之自害愚不至此惟是聖

主加意施保全之恩並教臣以自求保全之道臣有可憫之情不敢自隱臣抱病數月總未痊愈今已僅存皮骨動輒頭暈實實不能辦事伏祈聖主垂憐准臣到浙給假半年服藥調養少可支持再効奔走既不致有傷用人之明而從前結黨之輩亦共知聖主所施恩者斷非負心之人臣雖死亦瞑目矣臣不勝激切哀懇之至雍正三年五月初六日具

奏於儀正縣靜候綸音摺

太保公杭州將軍臣年羹堯謹奏爲聖主恩德弘深微臣負罪重大瀝陳下悃仰冀睿慈事竊臣自蒙聖主委任以來晉爵授階寵榮無比祖父馳封子嗣廢襲且賜予稠疊無所不有此聖主施恩誠不啻天之高地之厚矣乃臣以愚陋之資器小易盈又不能謹言慎行處已昧於謙卑辦事日多悖謬是臣之罪責已無所逃更沐天恩備施教誨周詳明悉至再至三臣跪讀上諭三道輾轉深思汗流浹背愧悔莫及惟自知愧悔而感激益深感激既深而恐懼彌甚雖已具摺遼旨回奏然臣之負罪如山萬死莫贖既不敢久羈陝省亦不敢遽赴浙

江聞江南儀正縣地方爲南北水陸分途今將川陝總督衙門欽部案件並臣任內皇上密交事務面與署督臣岳鍾琪逐一交代明白臣於雍正三年五月十七日起程前至儀正縣靜候綸音理合奏明伏祈聖主大施再造之恩曲賜生全之路庶幾犬馬之微軀猶圖矢報於將來臣不勝悚惶待罪之至謹繕摺泣奏以聞雍正三年五月十七日具

奏辯范時捷所參各款摺

太保公杭州將軍臣年羹堯爲遵旨明白回奏事雍正三年五月十八日臣於途次渭南縣接准兵部遞到內閣公文一件內開內閣爲欽奉上諭事雍正三年五月十一日奏事員外郎張文彬等交出鑲白旗漢軍都統范時捷原奏參摺奉旨交與內閣著年羹堯明白回奏欽此欽遵諭旨並范時捷原參奏摺發往杭州將軍年羹堯查收遵行等因到臣臣竊查范時捷參臣五款情罪重大我皇上天高地厚之恩不即發部提拿究擬仍諭內閣行文著臣明白回奏則事之虛實得以自陳恩威出自聖主臣感激涕零死且甘心敢不遂欵據實奏

聞第一欵臣查康熙六十一年西安開運米事例部議收銀七十二兩運米一石經臣復議收銀七十二兩運米二石迨至七月內臣往肅州督運兵糧到肅之日正大營需米口外草枯之際臣見事急先於西安鳳翔買米僱驃駛運因遠不濟事隨於平涼鞏昌臨洮寧夏各處分頭買米而秋盡冬初無人承運只得採買驃子打造車輛僱覓人夫又於涼甘一帶購買夫役口糧料豆皮衣等物但求於事無悞不惜用銀之多寡是以於十月發米出口時驃子之倒斃米料之虛費日日不免而冬春兩季除運足米四萬石外又多運米一萬石存貯肅州此次運糧實以天寒雪大事情緊急竭力辦理參差不齊而一切折耗太多僅能不悞事完之後變賣餘剩之口糧草料等物與各項節省銀共十二萬兩臣得了是實第二欵臣查康熙六十一年西安開例捐納每米一石折交銀七十二兩每駝一隻亦算米一石臣原於每米一石合正項使費收至九十六兩此人人所共知者並無勒定每石多要三十六兩之事自開捐起至停捐止共收米八千四百餘石除正項並造冊使用外臣於此案捐納收得羨餘銀十

八萬兩有零是實第三欵臣查陝省俸工除佐貳雜職外正印官有願捐者解貯藩庫以辦公事不願捐者亦聽之臣於雍正元年委官接濟延綏一帶復業窮民又因西寧用兵安設塘站製造子母砲火藥鉛子添補弓箭等物以及調撥進勦兵丁幫給駝載軍裝腳價以省馬力又建造育嬰堂養濟院數年以來臣共動用俸工銀五萬兩有零是實第四欵臣因辦理軍務凡大將軍行文與將軍督撫皆書其姓名狂肆之罪臣已屢行自認不敢復於此摺瀆辨是實第五欵臣謬膺督撫重任十有七年家道充足聖明在上不敢欺飾至於保舉題補官員昏謬錯誤者臣何能免若先收禮而後索謝與吞噬屬員並無其事是實以上被參五欵臣之所無者既得據實自陳臣之所有者亦已據實自認所得銀兩與動用俸工銀兩情願賠補臣罪至此更無可寬惟伏地叩首仰懇聖恩於萬不可赦之中曲賜再生之路臣之嘶感惟有圖報於生生世世而已謹遵旨明白回奏伏祈皇上睿鑒施行雍正三年五月二十五日具

硃批該部嚴察議奏

剖辯伊都立所參各欵摺

太保公杭州將軍臣年羹堯爲欽奉上諭事雍正三年六月十八日臣行次江南六合縣地方准兵部咨前事內開雍正三年六月初四日內閣交出署理山西巡撫事務刑部左侍郎伊都立謹奏爲奏明事臣竊見原任川陝總督今調杭州將軍年羹堯營私罔利掠美市恩種種狂悖已蒙聖明洞燭勅下廷臣嚴加察議但臣思年羹堯世受國恩至深至厚不知圖報反肆欺妄實爲天下之所同仇臣民之所共憤凡有聞見即當入告使其略無容隱然後按欵問擬明正其罪庶足以彰國法而懲奸詐臣從前歷任內廷未能盡悉其詳今就臣晉省所聞數端爲我聖上陳之如先年西塞用兵選調直隸山東山西河南四省官員赴甘肅効力蒙上諭令年羹堯酌量發回原任此誠皇上仁慈浩蕩加恩臣下之至意乃年羹堯輒借端勒令每員帮助銀四千兩現據軍前効力山西太平縣參革知縣張學都具呈并執有護理平慶臨鞏按察司即臨洮府知府王景灝轉行牌票可據且牌內稱有東省道員程之漳捐例可援一省如是他

省可知臣不識此項所帮何事作何開銷又如山陝兩省樂籍之人沉淪已久蒙皇上聖仁御宇首端風化悉令改籍爲良實出乾綱獨斷乃年羹堯攘爲己功播揚兩省一時傳爲美談更風聞有澤州樂籍竇經榮其人者被年羹堯索謝銀十萬兩尤爲謬妄至於晉省各官虧空累纍皆由大同府參革知府欒廷芳借名軍需苛派所致乃年羹堯于廷芳被參之後輒以爲有各屬欠項可抵廷芳虧空欲帶往陝省蒙聖明鑒察仍留在晉審追至今通省猶聞年羹堯受廷芳賄囑之談雖未知其確數而人言藉藉諒非無因臣現在提訊廷芳俟有確供另行摺奏臣荷蒙聖恩以卿貳委署巡撫既有所聞曷敢容隱謹繕摺具奏雍正三年六月初四日奉旨發與年羹堯着明白回奏欽此相應行文該將軍欽遵可也等因到臣竊查山西署撫臣伊都立參臣三欵其第一欵乃康熙六十一年有直隸山西山東河南四省揀選身家殷實才能之員赴肅州軍前効力內有張學都等五員尙未派委差使適蒙諭旨令臣酌量發回原任臣以張學都等五員在肅旣無委辦之事若竟令其回任則與已奉差使者勞逸不

均以此曉諭張學都等伊等各願捐銀四千兩先於肅州各交一半即貯肅州公庫又於西安交完一半卽貯西安藩庫經臣繕摺奏明給咨各令回任其銀兩之在肅州公庫者應聽部臣綽奇報銷其在西安藩庫者至今尙未動用此外有在軍前年久者必咨詢各處經營大人查無經手未完事件始敢給咨赴部非臣之所得自專亦並無勒令捐銀之事其第二欵改樂籍爲良民此聖主首端風化臣敢向何人攘爲已功索謝十萬臣不知其影響是實其第三欵參革大同府知府欒廷芳臣素不相識臣於雍正元年陞見回陝奉聖主令臣傳旨與晉撫臣德音欒廷芳虧空完結發往陝省効力臣欽遵傳旨之後從未過問並無受其賄囑之事總以臣之負罪重大致被諸臣指參乃蒙聖恩不即加罪此正臣感悔自新之時若事之所有斷不敢隱更增罪愆事之所無亦不敢不據實直陳以冀聖慈垂鑒謹遵旨明白回奏伏祈聖主睿鑒施行雍正三年六月二十五日具

剖辯李維鈞所參各欵摺

太保公杭州將軍臣年羹堯爲遵旨明白回奏事雍正三年七月初二日准署  
杭州將軍事浙江撫臣法海送到吏部咨文內開爲聖世難容負國之臣事吏  
科抄出直隸總督李維鈞題前事等因於雍正三年五月初十日題本月十六  
日奉旨這所參情由著年羹堯明白回奏欽此欽遵抄出到部相應移咨前去  
欽遵施行等因並抄疏到臣臣查直隸督臣李維鈞參臣三欵奉旨令臣明白  
回奏內一欵大將軍印信臣去年進京時原令侍讀學士臣懷親在署看守因  
恐有應行文之處隨帶空白四套是實至於賚繳大將軍勅印應候聖旨遵行  
臣並無向李維鈞云交不出去之語第二欵如原任湖南撫臣王之樞發陝効  
力臣惟冀其竭蹶急公並未得其田房李維鈞謂王之樞原籍定州田房早爲  
臣所得臣實茫然不知前因王之樞自限陸續交銀已交司庫銀十萬六千餘  
兩及至本年交銀甚少始據開報房產數處臣是以移咨李維鈞追變至徐昂  
發具呈原任江西撫臣王企墻得過伊銀三萬兩一面之詞未知虛實豈敢遽  
以贓私入告臣據呈咨追不過期於早完公事耳況王企墻亦係發陝効力之

員捐交銀十萬兩之外曾送臣銀一萬兩臣謂與其私餽盍若急公亦令其歸入効力之數王企墻現在直隸可問而知彼効力銀兩已完者臣尙不肯受其私餽則未完者臣斷無先飽己橐之理第三欵如西寧各寺喇嘛有爲賊人嚮導者有助賊人口糧者所以羅卜藏丹盡敢於三面犯我邊城且臨陣之頃喇嘛竟敢騎馬持械顯與官兵對敵官兵又豈肯留此奸僧即將對敵之喇嘛殺戮其餘逃竄隨焚郭莽寺與二格隆寺但臣原未親履行陣亦從未獲其鐳重至於臣經手軍需悉照時價較之從前報銷俱各減省並無冒銷之處夫以臣之負罪深重當此悔懼無及之時何敢一言虛飾理合遵旨明白回奏伏祈聖主睿鑒施行雍正三年七月十二日具

六十三

來件收到正值發下左相等十三摺孟章送來京甫啟封未閱擬看畢仍交該章京賚回看守明早回堂或交進俟再發下然後拆閱抑卽公閱希酌商醇親王泐酉初一刻

六十四

再朱原奏內如有護臺做法宜於以柔制剛之法下添朱一新原奏做法擬摘鈔分寄

酌辦

六十五

球檻昨繳六本茲全閱訖送收

共七八九  
十四號

署送間答看過酌擬數條以備公商

尙未謄出日內卽當錄送勸貝勒府也頃聞潘撫所裁

黃趙部衆有爲法雇用之

說奉聞設法爲妥醇親王泐二十八亥正

再第八號內光緒五年六月二十六日子義來函並照錄鈔單等件約十餘頁  
希詳閱一遍益可知球於日本之原委矣又及

再法續調軍與李梅亟盼轉圜之說並行仍是彼之故智台有防兵不少省三  
何驚慌乃爾可怪也德司滬關霍纏船政諒總署必有辦法滬留活口亦無那  
之舉耳洋商集議云云乃正經題目現有腹稿三條矣又及

六十六

署檔收到擬隨看隨送尊處以便共檢共記申報論俄艦來華一段頗是希飭  
鈔胥錄置樞府可爲奏對統籌之資訪剛電述暫計似可分條詳核留作偏方  
惟酬謝未免太遽設法招致則未必無益要在貴署牢籠有術耳至加釐弊各  
國彼豈甘受且於法何與仍以獨弊法人爲最善之策也醇親王泐廿四戌正

六十七

署檔已閱四本先繳希轉交此事兵戶因急於畫押不願南北洋遵議遂尋隙  
逕回巖倉具視復有一手廢藩一手建國爲矛盾云云是即允其議我獲兩瘠  
島而不能存中山之祀要之無用舍之又難是雞肋也倭果來議似仍以興滅  
繼絕爲言事必無成尙可以對環球耳將來水軍果成元氣充足宜以此事爲

發硎之具也醇親王泐二十四亥正

六十八

南洋旣與左聯銜請撥船茲復北洋又作一說北洋之措詞無論已拙見擬請嚴飭之旨先將船集於滬再另授機宜於楊前督請公酌不如此省三之望衆論之意皆無可副也如以爲可希將拙見奏及醇親王泐十七亥出一刻

六十九

頃接鈔件粵浙又起二波致巴曉曉諒署必即日電詢此等情節惟有是是非非少有回護纏擾益甚近來彼未肆披猖者皆我坦白大方之效也香濤論台事極當其日夜擾敵之策與拙見恰合惟五等云云殊露張慌且恐後難爲繼明日似可奏請照其意辦電摘要圖之希與諸位酌度醇親王泐二十三戌初

七十

照會計昨已發謝必瞿然日內該館作何態除已密函容澤源隨是防查外如有所聞務希與福司空相機回應並即示知以防意料所不及昨慈諭有由總

署預戒他國洋人觀戰出游免致玉石俱焚別生枝節等目漏未向諸公傳及此時似可從緩明言後由署通行知照預戒亦占地步之一道也倘偶被民損傷似宜明諭撫卹嚴儆生事彼必帖服又香濤以法攻台爲得計尙欲令省三誘之恕之乃他處又以爲憂見解不同有此者盛宣懷之議是否可行尙希諸公度之明詔內應陸續添入之語及刪去天討等字樣希料理無遺爲禱此泐

即候盡祉醇親王泐

七十一

赫事猶無定價殊悶人意彼云法倭勾結蓋亦覩我之定力何如耳此強彼紬此退彼進已於滬議時歷有明驗刻下但予以弗絕之機或可漸有結束稍亦退讓則局內之故智局外之妄論一齊來矣明早進內一晤布聞俾告內奏事

醇親王泐

七十二

手示欣悉法不准評論揚滋不悅故有是舉果能有成則今日照會可不落空

從此或可冀有結束是全賴諸公見機而作王因人成事何幸如之此復即候

蓋祺醇親王復

七十三

戊正一函計承青及細思三條楊已携回繙洋文倘明日來文即係駁此三條並另擬出他策來商我當作何答覆轉移間恐落後塵過慮所及希與諸公洞燭幾先爲妥亥正再泐

七十四

再此事明早務敬陳簾前上慰慈匱禮邸諸公前希代述鄙意再密故二字或由總辦向何緩可得其解

七十五

查此次法人侵擾一戰而基隆礮臺毀再戰而馬尾兵船沉是我之礮臺不固戰艦不堅歷有明證若仍恃二者拒敵定無獲勝算可操及至岸上獲勝我兵傷亡已多實爲非計近觀南北洋不肯撥船援閩非曰恐爲敵搶即曰難敵鐵

艦所慮誠是然不援他處則可若敵以大帮鐵木等船來犯仍將恃此不足恃之兵船礮臺禦之乎抑當翻然變計乎王去年曾有堅壁清野陸路設伏之議近與善都統論及亦不謀而合宜乘敵船未犯之先請旨嚴詢南北洋除戰船礮臺外有何必勝之策斷勿置兵於萬不足恃之地徒喪精銳致墮士氣爲要

醇親王議

七十六

來電述梅語與南洋轉閣下電同華陸軍法水軍各擅所長勝負正未可知豈能因閩戰中止巴逗遛雖有用意華未驅逐已見寬大若仍任其虛聲相要何以對中外乎且法若允美國調處或法人另請早當就緒令他國一同調處旨已宣亦難自作轉圜之計矣

七十七

譯好粘封速送閩中堂雙密昨呈七欵林云切勿漏洩與在京及津來之洋人知悉致彼國生疑無可調處並求達知邸府今日又飛電暫緩攻台宣稟

七十八

何說三層第一原是不允此無名之費然只說不允何補第二俟今日照會行後彼仍不允即照辦然亦空而無補第三與其自燬不若先將靈巧各件撤淨只留笨重之物不成全分彼亦無所用之擬電閻速辦能伏地雷使彼入則俱碎尤妙

七十九

照會底二件閱悉並無更改頃接各鈔件已擇要致函於閣<sub>中堂</sub>許大人矣初六日酉正

八十

樵野所續後段仍覺未暢此舉無論成否既屬創格似宜詳盡茲將續擬送閱希鈔入草底以供刪改法國不准四字已悉問答尙未鈔來不知與此舉合否也醇親王泐十七日亥初

八十一


詔示天下各層敦信修睦歷有年所天津教堂等案法人乘中國多事取西貢

復窺伺全越寶海之議脫里古之議犯我北寧防軍正整旅進討福晉請和五  
條不妥處云云猶思保全和局降心以從乃無故犯我十餘年駐軍之地首先  
開礮我軍憤極還擊遂獲大捷仍欲講和不責開衅不索陪償將粵軍退回百  
餘里乃法人竟云云我仍云云今法人云云各國商務地方官妥爲保護法使  
法商亦一律保護惟犯華兵船各省合力痛勦中國百姓蓄憤已久有能協助  
官軍者予以不次之賞教民安分守法者一視同仁倘有接濟助惡情事無論  
軍民准其告發立予正法

八十二

照復巴曾大致謂諒山之役兩執一理均難遷就若因此失和開戰兩國不利  
之處前次照會已詳述無遺諒貴大臣銜命來華必已通盤籌畫計及久遠本  
爵連日與美國楊大臣何參贊議商調處之法漸有頭緒昨忽接我南洋大臣  
信稱貴大臣云云查此事旣由楊大臣出爲調處美國主必有持平之論雖爲  
日稍緩然兩國均免耗損財力塗炭生靈各國商務亦免因此有損不圖貴大

臣迫不及待動言戰事致此平安辦法廢於一旦甚屬可惜今與貴大臣約定  
如以美國主調處爲然即報明貴外部立即舉辦並照覆本爵以便與楊大臣  
訂准開辦之法於日內覆知貴大臣以爲確據所有我南洋大臣等旣此事無  
權即暫行各回本任俟美國主評論妥協兩國簽押後再行開辦津約詳細條  
款彼時或在上海或在天津悉聽貴大臣之便中國屆時簡派大臣前往商  
辦津約一成從此兩國各興有益國家之事永敦睦誼庶不爲天下萬世所訾  
議若貴大臣執定動兵之議不顧中國和好之實情不從美國調處之好意亦  
當明白約定凡乘我實心講和之際潛入福建內河兵船全行退出由兩國布  
告各國保護商務然後明訂戰期堂堂正正以角兵力若以入閩之船爲扼吭  
之計是明言講解暗行詭道中國雖負有光明之理貴國雖勝有詐僞之恥必  
爲各國所笑矣



違礙書籍單

乾隆四十四年九月閩浙總督兼署福建巡撫三寶查繳  
軍機處存檔

大學士管閩浙總督兼署福建巡撫臣三寶謹奏爲查繳應燬各書恭摺具奏  
事竊照各省欽奉諭旨查繳違礙書籍臣前於浙江湖廣督撫任內節經飭屬  
實力訪查陸續具摺奏繳今臣仰蒙恩命調管閩浙到任後即嚴飭各地方官  
會同教職悉心查繳仍遵前奉派委妥人細訪詳查之諭旨札令各屬於地方  
紳士中慎選制行循謹素爲闡井悅服者每縣數人分派城鄉轉向親友密訪  
務將違礙各書悉行繳出毋致遺漏茲據閩省各屬陸續呈送由布政使德文  
彙總具詳前來臣查閩省前任督撫臣已經奏繳過違礙書籍六次今又繳送  
到應燬書一百十三種查有缺本及重複共計現繳書三百十一部內閩省前  
未繳過今查出書五十一種計一百三十五部前已繳過今查出書六十二種  
計一百七十六部臣逐一檢閱俱有違礙係應燬之書理合恭摺奏繳并開具  
清單謹呈御覽一面委員解送軍機處查辦銷燬臣仍督飭各屬再行悉心訪  
覈務令淨盡不使稍有存留外臣謹繕摺具奏伏乞皇上睿鑒謹奏乾隆四十

四年九月初六日奉硃批覽

應燬書目清單

大學士管理閩浙總督兼署福建巡撫臣三寶謹奏謹將福建省續查出應燬各書開列清單恭呈御覽

計開

前未繳過此次查出應燬書五十一種計一百三十五部

輿圖備考一部 刊本

是書明潘光祖輯李雲翔參訂計十八卷內語有干礙且李長庚序刻於順治七年書中前明字樣擡頭體例乖謬

帝王歷數統系一部 刊本

是書明夏洪基編定計二卷所載金紀分註內字句有違礙

古今帝王世系地域圖略一部 刊本

是書明俞煥章輯計四卷其卷二末及卷四內九邊圖論俱有違礙

萬寶全書一部 刊本

是書明劉雙松輯內分天文等門計三十九卷語涉觸礙並有符咒邪  
妄處原缺十一卷至十四卷又缺十八卷至三十四卷

歷代紀要一部 刊本

是書國朝王大輝著分上下二卷又附列國一卷內字多違碍  
代言集一部 刊本

是書國朝李效著計六卷內有講義推呂留良處

宋文歸一部 刊本

是書明鍾惺評計二十卷內論邊事語多干礙原缺卷三至卷六

四書講義錄一部 刊本

是書國朝黃瑞訂計十五卷內有引用呂留良語原缺十論三卷

四書會註會意解一部 刊本

是書國朝張庸德補內多呂留良說只存中庸一卷不全

歷科墨選一部 刊本

是書評選失名內有呂留良評語原只存中庸一本不全

歷科小題文選一部 刊本

是書吳士玉選內有呂留良評只存上論中庸上孟三本不全  
歷科程墨質疑集二部 刊本

是書李沛霖定內有呂留良評一部只存四本又一部只存二本俱不全

選註三場策一部 刊本

是書評選失名內有錢謙益策只存卷四一本不全

歷史一覽一部 刊本

是書明徐奮鵬著計六卷宋論內語涉干礙

留青二集一部 刊本

是書國朝陳枚輯內有錢謙益文只存卷二卷七兩本不全

增訂羣書備考四部 刊本

是書明袁黃著計四卷內城塞等篇語句干礙

寅齋詩二部 刊本

是書國朝揭世忠著有王錫侯序文

王季重小品一部 刊本

是書明王思任著計二卷語有狂妄

三易集二部 刊本

是書明唐時升著計二十卷內有達礙字樣

錢謙益經序二十一部 刊本

是書錢謙益著每部各計一冊

錢謙益史序二十二部 刊本

是書錢謙益著每部各計一冊內二十一部全又一部不全

明詩歸三部 刊本

是書明鍾惺評選計十二卷內載錢謙益等違礙詩句二部全又一部原缺卷二至卷末不全

留青集五部 刊本

是書國朝陳枚輯計十卷字句涉違碍又載錢謙益詩內三部全一部原缺卷一卷三卷四卷六卷八卷九卷十又一部原缺卷一卷三至卷十俱不全

留青廣集十部 刊本

是書國朝陳枚輯計十二卷字句涉違礙又載錢謙益詩內七部全一部只存卷七卷十又一部只存卷二又一部只存卷四俱不全

吳梅村全集一部 刊本

是書吳偉業著計四十卷內載錢謙益序及書

吳梅村詩二部 刊本

是書吳偉業著計二十卷內有錢謙益倡和詩篇內一部全一部原缺

卷一至卷三卷九至卷十一卷十七至卷末

聽嚶堂翰苑英華一部 刊本

是書國朝黃始著計六卷內有錢謙益文

雙槐歲抄一部 刊本

是書明黃瑜著計十卷其卷九內建州一篇語有違礙

壯悔堂文集一部 刊本

是書侯方域著計十卷語有失體

壯悔堂四憶堂詩文合訂一部 刊本

是書侯方域著計十六卷

必讀綱鑑一部 刊本

是書張鼐輯計十卷語涉干礙

啟楨野乘一部 刊本

是書鄒漪纂計十二卷有錢謙益序語涉干礙

癡山集一部 刊本

是書陳孝逸著計六卷內有推錢謙益處

江左三家詩鈔二部 刊本

是書錢謙益吳偉業龔鼎孳著顧有孝趙灤輯計九卷一部全一部原缺吳偉業詩三卷

五家詩選一部 刊本

是書鄒漪輯只存錢謙益吳偉業兩家詩一本不全

留青全集五部 刊本

是書國朝陳枚輯計二十四卷內載錢謙益文二部全一部原缺卷一至卷六卷十卷十四至卷十八卷二十一卷二十四又一部原缺卷一卷三卷十一至卷末又一部只存卷十二卷十三俱不全

留青新集四部 刊本

是書國朝陳枚輯計三十卷內有錢謙益屈大均文二部全一部原缺

卷十五又一部原缺卷五卷六卷七卷十二卷十五卷二十四至卷三十俱不全

天外談二部 刊本

是書石龐著計四卷語多乖僻一部原缺卷三卷四又一部原缺卷一

卷三卷四俱不全

歸震川時文二部 刊本

是書明歸有光著呂留良評

金正希時文八部 刊本

是書明金聲著呂留良評六部全一部只存中庸又一部只存中庸上

孟俱不全

碧山學士集一部 刊本

是書明黃洪憲著呂留良編次

質亡集一部 刊本

是書呂留良評選

天蓋樓五家文一部 刊本

是書呂留良評選內缺艾南英學庸一本陳際泰下論一本

天蓋樓三家文一部 刊本

是書呂留良評選計七本

詩經詳解一部 刊本

是書呂留良著計八卷

呂留良四書題說一部 刊本

是書黃殿友彙輯計四本

恨亭語錄三部 刊本

是書釋智謐等編兩部各計十二卷一部無分卷次俱全

明鑑易知錄二部 刊本

是書朱國標輯計十五卷萬歷以後語涉干穢

徐文長三集二部 刊本

是書明徐渭著計二十九卷又附雜記一卷語涉違礙一部全一部只存卷七至卷十一不全

古今文統一部 刊本

是書明陳仁錫纂只有卷三卷四卷七至卷十六不全

澹園集一部 刊本

是書明焦竑撰計四十九卷

前已繳過此次續查出應燬書六十二種計一百七十六部

重訂會纂綱鑑六部 刊本

是書呂一經重訂將明史事續入會纂綱鑑後今續查出六部

續綱鑑六部 刊本

是書仇滄柱郭彥博增定今續查出六部內五部全一部原缺卷二十

九卷三十不全

通鑑全載輯略二部 刊本

是書朱青岩編定續於袁黃綱鑑補後今續查出二部

明鑑紀一部 刊本

是書袁黃綱鑑補後增入今續查出一部

山曉閣明文選一部 刊本

是書孫琮評選今續查出一部

蒼霞草一部 刊本

是書葉向高著今續查出一部只存卷十卷十一不全

李氏藏書六部 刊本

是書李贊輯今續查出六部內二部全一部原缺序目又一部原缺卷二十四卷二十五卷二十八至卷三十卷五十七至卷六十四又一部原缺卷一至卷十八卷四十至卷四十二卷六十一至卷六十四又一部原缺卷九至卷十三卷十七至卷十九卷二十四至卷二十五卷三

十二至卷四十一卷四十九至卷五十七卷六十一至卷六十四又一部只存卷三至卷八又一部只存卷三卷四卷五俱不全

李氏續藏書五部 刊本

是書李贊著今續查出五部內三部全一部原缺卷三卷四卷七卷八卷九卷十四卷十五卷二十一卷二十二卷二十五至卷三十七又一部只存卷一卷二俱不全

李氏文集二部 刊本

是書李贊著今續查出二部

李氏焚書三部 刊本

是書李贊著今續查出三部內二部全一部只存卷一不全

過庭訓人物考一部 刊本

是書過庭訓纂今續查出一部

潛確類書六部 刊本

是書明陳仁錫纂今續查出六部內一部全一部只存序目卷九卷十  
卷一百至卷一百二十又一部只存卷二十卷三十六卷三十七卷三  
十九卷四十二卷四十三卷四十八卷四十九卷五十二卷五十三卷  
一百十至卷一百十二卷一百十九卷一百二十又一部只存序目卷  
四卷五卷十卷二卷六十三卷六十四卷一百四又一部只存卷三十  
八卷四十三卷八十一卷八十二卷九十一卷九十二又一部只存卷  
九十七卷九十八俱不全

鴻書一部 刊本

是書劉仲達著今續查出一部

嶺南三家詩選二部 刊本

是書梁佩蘭屈大均陳恭尹著今續查出二部內一部全一部只存卷  
一至卷八不全

吾學編一部 刊本

是書明鄭曉著今續查出一部

明紀編年一部 刊本

是書明鍾惺著今續查出一部

王鳴昌難題問答十一部 刊本

是書王鴻昌論定今續查出十一部內八部全一部原缺下孟又一部  
原缺大學又一部原缺大學下論俱不全

博物典彙二部 刊本

是書明黃道周纂今續查出二部

瀚海五部 刊本

是書陳繼儒定今續查出五部

已吾集二部 刊本

是書陳際泰著今續查出二部內一部全一部原缺卷一至卷三不全

明通紀會纂三部 刊本

是書鍾惺著今續查出三部內一部原缺卷三又一部原缺卷四卷五  
卷六又一部只存卷二卷三俱不全

明通紀纂要一部 刊本

是書鍾惺著今續查出一部

通鑑明紀全載十部 刊本

是書朱青岩輯今續查出十部內五部全一部原缺卷九至卷末又一部原缺卷一卷二卷四十六卷四十七卷五十卷五十一又一部只存卷五十一至卷五十五又一部只存首二卷又一部只存卷五十卷五十一俱不全

避園擬存一部 刊本

是書王思任著今續查出一部

考卷探珠集一部 刊本

是書陸成岑選今續查出一部

黃陶菴文集一部 刊本

是書黃淳耀輯今續查出一部

資治大方通鑑一部 刊本

是書李廷機輯今續查出一部

三藩紀事本末一部 刊本

是書楊陸榮著今續查出一部

明通紀三部 刊本

是書陳建輯今續查出三部內一部全一部原缺卷四至卷七卷十五  
卷十六又一部只存卷八卷九俱不全

秘笈一部 刊本

是書陳繼儒輯今續查出一部

明從信錄二部 刊本

是書陳建輯今續查出一部內一部全一部只存卷三十三至卷三十

六不全

王忠端集三部 刊本

是書王家彥著今續查出三部內一部全一部原缺卷十一卷十二又一部原缺卷七至卷十俱不全

講義五部 刊本

是書呂留良著今續查出五部內四部全一部原缺卷一至卷三不全四書語錄一部 刊本

是書呂留良著今續查出一部

顧亭林集二部 刊本

是書顧炎武著今續查出二部內一部全一部只存卷一至卷六不全

四六新書廣集三部 刊本

是書黃始定今續查出三部內一部全一部原缺卷五卷六卷八至卷

末又一部原缺卷七至卷末俱不全

歷朝捷錄十部 刊本

是書顧充編今續查出十部內六部全一卷原缺卷一卷二又一部只存卷一至卷五又一部只存卷十至卷二十五又一部只存卷一至卷十一俱不全

八家文一部 刊本

是書呂留良選今續查出一部

天蓋樓偶評八部 刊本

是書呂留良評今續查出八部內四部全一部原缺學庸文又一部原缺上論文又一部零星雜訂只存七本又一部殘缺失次只存七束俱不全

陳際泰時文六部 刊本

是書呂留良評今續查出六部內三部全一部原缺首一本又一部原缺學庸文又一部原缺孟子文俱不全

戴名世時文四部 刊本

是書戴名世著今續查出四部內一部全一部原缺下論中庸下孟文  
又一部雜訂一本俱不全

文娛二部 刊本

是書鄭元勳選今續查出二部內一部全一部只存序文一本不全

徐文長文集十部 刊本

是書徐渭著今續查出十部內四部全一部原缺卷二十八至卷三十  
又一部原缺卷一至卷十卷十九至卷二十三又一部原缺卷四至卷  
十四又一部只存卷二十至卷二十三又一部只存卷一至卷六又一  
部只存卷二十二至卷三十俱不全

明館課二部 刊本

是書王錫爵選今續查出二部內一部原缺卷八至卷十二又一部原  
缺卷一卷九卷十二卷十五俱不全

大義覺迷錄一部 刊本

前已繳過今續查出一部只存卷二卷四

登壇必究三部 刊本

是書王鳴鶴編今續查出三部內一部原缺卷二又一部只存卷十五  
卷十九卷二十各頁又一部只存卷六至卷九卷十二至卷二十卷二  
十六至卷三十卷三十七卷三十八俱不全

古今治平略三部 刊本

是書明朱健著今續查出三部內一部只存卷一至卷五卷八至卷三  
十三又一部只存卷四卷五卷十六卷二十一又一部只存卷二十八  
俱不全

古今議論參二部 刊本

是書林德謀纂今續查出二部內一部只存卷九至卷二十五卷三十  
至卷三十五卷四十八至卷五十五又一部只存卷十九至卷二十五

俱不全

歷朝詩集一部 刊本

是書錢謙益選今續查出一部只存甲集一本乙集二本丙集四本丁集十本閏集三本不全

名山藏一部 刊本

是書何喬遠輯今續查出一部只存卷四至卷二十九不全

三朝要典一部 刊本

是書顧秉謙編今續查出一部只存卷二至卷八卷十三卷十四卷十九卷二十不全

百將傳一部 刊本

是書陳裕輯今續查出一部

蘭臺遺集二部 刊本

是書江日彩輯今續查二部內一部全又一部原缺詩集不全

法傳錄一部 刊本

是書陳建著今續查出一部只存卷一至卷五不全

棄草三部 刊本

是書周之夔著今續查出三部內二部全一部原缺卷五卷六不全

五雜組一部 刊本

是書謝肇淛著今續查出一部只存卷三卷四卷七卷八卷十一卷十二不全

鴻猷錄一部 刊本

是書高岱輯今續查出一部只存卷一至卷四卷九至卷十六不全

黃陶菴時文一部 刊本

是書呂留良評今續查出一部原缺上論

呂晚村四書文四部 刊本

是書呂留良著今續查出四部

隱秀軒一部 刊本

是書鍾惺著今續查出一部只存卷一不全

羣書典彙一部 刊本

是書黃道周著今續查出一部只存卷八卷九卷十四不全

武備志一部 刊本

是書茅元儀輯今續查出一部只存卷二十至卷二十五卷三十至卷三十四卷一百三十至卷一百二十三卷一百九十二至卷二百五卷二百十三至卷二百十五卷二百二十四卷二百二十五卷二百三十六至卷二百四十

以上共應燬書一百十三種共計三百十一部

中華民國十九年十月出版

文獻叢編第八輯

編輯所

故宮博物院


發行所

故宮博物院出版物發售室  
電話東局一六〇九

印刷所

和濟印刷局  
和濟平門內後細瓦廠

郵費	項目	價	每月一冊	半年六冊	全年十二冊
本	五角	五			
市外	二元七角	二元七角			
埠	五元二角	五元二角			
外	五元二角五分	五元二角五分			
國					



本市 上海 天津各大書店均有代售

